

元史

卷一百十四  
之一百二十

涵芬樓  
影印

Inches 1 2 3 4 5 6 7 8  
Centimetres 1 2 3 4 5 6 7 8 9 10 11 12 13 14 15 16 17 18 19

TIFFEN Color Control Patches

© The Tiffen Company, 2007

Blue

Cyan

Green

Yellow


Red



Magenta

White

3/Color

Black







元史卷一百十四

明翰林學士亞中大夫知制誥兼修國史宋 濂等修

列傳第一

后妃

太祖光獻翼聖皇后名旭真弘吉刺氏特薛禪之女也  
特薛禪與子按陳從太祖征伐有功賜號國舅封王爵  
以統其部族有旨生女爲后生男尚公主世世不絕世  
祖至元二年十二月追諡光獻翼聖皇后冊文曰尊祖  
宗致誠孝實王政之攸先法天地建鴻名亦母儀之克  
稱肆先虔於太室庸昭示於後昆體茲至公節以大惠

欽惟光獻皇后宅心淵靜稟德柔嘉當聖神創業之初  
有夙夜求賢之助功施社稷垂慈訓於景襄慶衍宮闈  
流徽音於莊聖協贊龍飛之運永詒燕翼之謀惟周人  
著稱思齊亦推本興王之迹在漢世始諡光烈蓋篤申  
追遠之情是用稽迪舊章增崇遺美謹遣攝太尉某奉  
玉冊玉寶加上尊諡曰光獻翼聖皇后伏惟淑靈降格  
典禮備膺於億萬年茂隆丕祚升祔太祖廟其餘后妃  
有四幹耳朵四十餘人不記氏族其名悉見于表後皆  
倣此

太宗昭慈皇后名脫列哥那乃馬真氏生定宗歲辛丑

十一月太宗崩后稱制攝國者五年丙午會諸王百官  
議立定宗朝政多出於后至元二年崩追諡昭慈皇后  
升祔太宗廟

定宗欽淑皇后名幹兀立海迷失定宗崩后抱子失列  
門垂簾聽政者六月至元二年追諡欽淑皇后

憲宗貞節皇后名忽都台弘吉刺氏特薛禪孫忒哥陳  
之女也蚤崩后妹也速兒繼爲妃至元二年追諡貞節  
皇后升祔憲宗廟

世祖昭睿順聖皇后名察必弘吉刺氏濟寧忠武王按  
陳之女也生裕宗中統初立爲皇后至元十年三月授

冊寶上尊號貞懿昭聖順天睿文光應皇后一日四怯  
薛官奏割京城外近地牧馬帝既允方以圖進后至帝  
前將諫先陽責太僕劉秉忠曰汝漢人聰明者言則帝  
聽汝何爲不諫向初到定都時若以地牧馬則可今軍  
餼俱分業已定奪之可乎帝默然命寢其事後嘗於太  
府監支繒帛表裏各一帝謂后曰此軍國所需非私家  
物後何可得支后自是率宮人親執女工拘諸舊弓弦  
練之緝爲網以爲衣其鞞密比綾綺宣徽院羊臠皮置  
不用後取之合縫爲地毯其勤儉有節而無棄物類如  
此十三年平宋幼主朝于上都大宴衆皆歡甚唯后不

樂帝曰我今平江南自此不用兵甲衆人皆喜爾獨不  
樂何耶后跪奏曰妾聞自古無千歲之國毋使吾子孫  
及此則幸矣帝以宋府庫故物各聚置殿庭上召后視  
之後徧視卽去帝遣宦者追問后欲何所取后曰宋人  
貯蓄以遺其子孫子孫不能守而歸於我我何忍取一  
物耶時宋太后全氏至京不習北方風土后爲奏令回  
江南帝不允至三奏帝乃荅曰爾婦人無遠慮若使之  
南還或浮言一動卽廢其家非所以爲愛也苟能愛之  
時加存卹使之便安可也后退益厚待之胡帽舊無前  
簷帝因射日色炫目以語后后卽益前簷帝大喜遂命

爲式又製一衣前有裳無衽後長倍於前亦無領袖綴以兩襟名曰比甲以便弓馬時皆倣之后性明敏達於事機國家初政左右匡正當時與有力焉十四年二月崩三十一年成宗卽位五月追諡昭睿順聖皇后其冊文曰奉先思孝臣子之至情節惠易名古今之大典惟殷娥有明德之號而周任著思齊之稱爰考舊章式崇尊諡恭惟先皇后厚德載物正位承天隆內治於公宮綱大倫於天下曩事龍潛之邸及承虎變之秋鄂渚班師洞識事機之會上都踐祚居多輔佐之謀先物之明獨斷于衷進賢之志允叶于上左右我聖祖建帝王之

極功撫育我前人嗣社稷之重託臣下之勤勞灼見生民之疾苦周知儷宸極二十年垂慈範千萬世唯全美聖而益聖宜顯冊書而屢書不勝惓惓懇懇之誠敬展尊尊親親之義以揚盛烈以對耿光謹遣某官某奉玉冊玉寶上尊諡曰昭睿順聖皇后欽惟淑靈在天明鑒逮下增輝煒管茂揚徽懿之音合享太宮益衍壽昌之福升祔世祖廟

南必皇后弘吉刺氏納陳孫仙童之女也至元二十年納爲皇后繼守正宮時世祖春秋高頗預政相臣常不得見帝輒因后奏事焉有子一人名鐵蔑赤

成宗貞慈靜懿皇后名失憐荅里弘吉刺氏斡羅陳之女也大德三年十月立爲后生皇子德壽早薨武宗至大三年十月追尊諡貞慈靜懿皇后其冊文曰宗祧定位象天地之有陰陽今古同符通幽明以行典禮哀榮斯備孝敬兼陳恭惟先元妃弘吉刺氏慶毓仙源德昭彤史春宮主饋共瞻采翟之輝椒掖正名莫際飛龍之會惟貞協在中之美而慈推成物之仁靜旣合夫坤元懿益彰於壺則雖小星之逮下豈衆曜之敢齊嗣服云初追懷曷已是用究成先志式闡徽稱謹遣某官某上尊諡曰貞慈靜懿皇后升祔於成宗皇帝殿室伏惟淑

靈永伸配侑介以景福佑我無疆

卜魯罕皇后伯岳吾氏駙馬脫里思之女元貞初立爲皇后大德三年十月授冊寶成宗多疾后居中用事信任相臣哈刺哈孫大德之政人稱平允皆后處決京師勅建萬寧寺中塑祕密佛像其形醜怪后以手帕蒙覆其面尋傳旨毀之省院臺臣奏上尊號帝不允車駕幸上都后方自奏請帝曰我病日久國家大事多廢不舉尚寧理此等事耶事遂寢大德十年后嘗謀貶順宗妃荅吉與其子仁宗往懷州明年成宗崩時武宗在北邊恐其歸必報前怨后乃命取安西王阿難荅失里來京

師謀立之仁宗自懷州入清宮禁既誅安西王并構后以私通事出居東安州

武宗宣慈惠聖皇后名真哥弘吉刺氏脫憐子逆不刺之女至大三年四月冊爲皇后其文曰乾爲天坤爲地四時由是以相成日宗陽月宗陰萬象以之而並著后職有關於世教先猷具載於邦彝惟慈旨之親承亦僉言之允若咨爾皇后弘吉刺氏睿聰淑哲端懿誠莊寶婺分輝源天潢之自出纓徽迪慶系統組以相仍後逸皇慶二年立長秋寺掌皇后宮政秩三品泰定四年十一月崩上尊諡曰宣慈惠聖皇后升祔武宗廟

速哥失里皇后按陳哈兒只之女真哥皇后之從妹也妃二人亦乞烈氏奴兀倫公主之女實生明宗天歷二年追諡仁獻章聖皇后唐兀氏生文宗天歷二年追諡文獻昭聖皇后

仁宗莊懿慈聖皇后名阿納失失里弘吉刺氏生英宗皇慶二年三月冊爲皇后上冊寶遣官祭告天地於南郊及太廟改典內院爲中政院秩正二品英宗卽位上尊號皇太后其冊文曰坤承乾德所以著兩儀之稱母統父尊所以崇一體之號故因親而立愛宜考禮以正名恭惟聖母溫慈惠和淑哲端懿上以奉宗祧之重下

以敘倫紀之常恢王化于二南嗣徽音於三母輔佐先  
考憂勤警戒之慮深擁佑眇躬撫育提攜之恩至迨于  
今日紹我不丕基規模一出於慈闈付托益彰於祖訓致  
天下之養以爲樂未足盡於孝心極域中之大以爲尊  
庶可稱其懿美式遵貴貴之義用罄親親之情謹遣某  
官某奉冊上尊號曰皇太后伏惟周宗綿綿長信穆穆  
備洛書之錫福粲坤極之儀天啟佑後人永錫胤祚明  
日受百官朝賀于興聖宮至治二年崩上諡莊懿慈聖  
皇后其冊文曰致孝所以揚親易名所以表行矧爲天  
下母而養弗逮履天子位而報則豐曷勝孺慕之心必

盡欽崇之禮欽惟先皇太后夙明壺則克嗣徽音輔佐  
先朝有恭儉節用之實誕育眇質有劬勞顧復之恩九  
族咸育於仁四海仰遵其化昊天不弔景命靡融愴聖  
善之長違念風猷之未泯是用揄揚于彤史正宜敷繹  
于寶慈爰據彝經追嚴徽號謹遣攝太尉某官某奉玉  
冊玉寶上尊號曰莊懿慈聖皇后伏惟淑靈如在合饗  
太宮鑒格孔昭膺茲巨典陰相丕祚億萬斯年升祔仁  
宗廟

英宗莊靜懿聖皇后名速哥八刺亦啟烈氏昌國公主  
益里海涯女也至治元年冊爲皇后泰定四年六月崩

諡曰莊靜懿聖皇后

泰定帝八不罕皇后弘吉刺氏按陳孫幹留察兒之女  
泰定元年冊爲皇太后

妃二人一曰必罕一曰速哥答里皆弘吉刺氏充王買  
住罕之女也文宗天歷初俱安置東安州

明宗貞裕徽聖皇后名邁來迪生順帝而崩文宗立諡  
貞裕徽聖皇后

八不沙皇后成宗甥壽寧公主之女也侍明宗潛邸生  
寧宗天歷二年立寧徽寺掌明宗皇后宮事以鈔萬錠  
幣帛二千疋供后宮費用十一月后請爲明宗資冥福

命帝師率諸僧作佛事七日于大天源延聖寺道士建  
醮于玉虛天寶太乙萬壽四宮及武當龍虎二山至順  
元年敕有司供明宗后宮幣帛二百疋是年四月崩

文宗卜荅失里皇后弘吉刺氏父駙馬魯王瑯阿不刺  
母魯國公主桑哥吉刺文宗居建業后亦在行天歷元  
年文宗卽位立爲皇太后二年授冊寶十一月后以銀五  
萬兩助建大承天護聖寺至順元年以籍沒張珪家田  
四百頃賜護聖寺爲永業后與宦者拜住謀殺明宗后  
八不沙三年八月文宗崩于上都后導馭末命申帝初  
志遂立明宗次子懿璘質班是爲寧宗十一月奉玉冊

玉寶尊皇后爲皇太后十二月御興聖殿受朝賀寧宗崩大臣請立太子燕帖古思后曰天位至重吾子尙幼明宗長子妥懽帖睦爾在廣西今十三歲矣理當立之於是奉旨迎至京師以明年未用卽位是爲順帝元統元年尊爲太皇太后仍稱制臨朝至元六年六月詔去尊號安置東安州尋崩

寧宗荅里也忒迷失皇后弘吉刺氏至順三年十月立爲后至正二十八年崩升祔寧宗廟

順帝荅納失里皇后欽察氏太師太平王燕鐵木兒之女至順四年立爲后元統二年授冊寶其冊文曰天之

元統二氣配莫厚於坤儀月之道循右行明同貞於乾耀若昔帝王之宅后居多輔相之世勳蓋選德於亢宗亦疇庸於先正造周資任姒之化興漢表馬鄧之功咨爾皇后欽察氏雍肅惠慈謙裕靜淑迺祖迺父夙堅翼亮之心于國于家實獲修齊之助朕纘丕圖之初載親承太后之睿謨眷我元臣簡茲碩媛相嚴禋而率典奉慈極以愉顏用彰禕翟之華式著旂常之舊令攝太尉某官授以玉冊寶章命爾爲皇后備成嘉禮宏賁大猷於戲嵩高生賢予篤懷于良佐關雎正始爾勉嗣於徽音永錫壽康昭示悠久三年后兄御史大夫唐其勢以

元史卷一百四十四 列傳 九  
謀逆誅弟塔刺海走匿后宮后以衣蔽之因遷后出宮  
丞相伯顏鳩后于開平民舍

伯顏忽都皇后弘吉刺氏宣慈惠聖皇后真哥姪毓德  
王孛羅帖木兒之女也至元三年三月立爲皇后其冊  
文曰帝王之道齊其家而天下平風教所基正乎位而  
人倫厚爰擇配以承宗事若稽古以率典常咨爾弘吉  
刺氏淑哲溫恭齊莊貞一屬選賢於中壺躬受命於慈  
闈勗帥來嬪蹈築儀之有度動容中禮謹夙夜以無違  
茲表式於宮庭宜推崇其位號乃蠲吉且庸舉彝章遣  
攝太尉某持節授以玉冊寶章命爾爲皇后於戲乾施

坤承克順成於四序日月儷久照臨於萬方朕欲躋  
世於乂安爾其助予之德化共御亨嘉之運益延昌熾  
之期勉爾徽音聿修內治生皇子真金二歲而天后性  
節儉不妬忌動以禮法自持第三皇后奇氏素有寵居  
興聖西宮帝希幸東內后左右以爲言后無幾微怨望  
意從帝時巡上京次中道帝遣內官傳旨欲臨幸后辭  
曰暮夜非至尊往來之時內官往復者三竟拒不納帝  
益賢之帝嘗問后中政院所支錢糧皆傳汝旨汝還記  
之否后對曰妾當用則支關防出入必已選人司之妾  
豈能盡記耶居坤德殿終日端坐未嘗妄踰戶闕至正

二十五年八月崩年四十二奇氏后見其所遺衣服敝壞大笑曰正宮皇后何至服此等衣耶其樸素可知踰月皇太子自冀寧歸哭之甚哀

完者忽都皇后奇氏高麗人生皇太子愛猷識理達臘家微用后貴三世皆追封王爵初徽政院使禿滿迭兒進爲宮女主供茗飲以事順帝后性穎黠日見寵幸後荅納失里皇后方驕妬數箠辱之荅納失里旣遇害帝欲立之丞相伯顏爭不可伯顏罷相沙剌班遂請立爲第二皇后居興聖宮改徽政院爲資政院后無事則取女孝經史書訪問歷代皇后之有賢行者爲法四方貢

獻或有珍味輒先遣使薦太廟然後敢食至正十八年京城大饑后命官爲粥食之又出金銀粟帛命資政院使朴不花於京都十一門置冢葬死者遺骸十餘萬復命僧建水陸大會度之時帝頗怠於政治后與皇太子愛猷識理達臘遽謀內禪遣朴不花諭意丞相太平太平不荅復召太平至宮舉酒賜之自申前請太平依違而已由是后與太子嚙之而帝亦知后意怒而疏之兩月不見朴不花因后而寵幸旣被劾黜后諷御史大夫佛家奴爲之辯明佛家奴乃謀再劾朴不花后知之反嗾御史劾佛家奴謫居潮河初奇氏之族在高麗者怙

勢驕橫高麗王怒盡殺之二十三年后謂皇太子曰汝何不爲我復讐耶遂立高麗王族人留京師者爲王以奇族之子三寶奴爲元子遣同知樞密院事崔帖木兒爲丞相用兵一萬并招倭兵共往納之過鴨綠水伏兵四起乃大敗餘十七騎而還后大慚二十四年七月孛羅帖木兒稱兵犯闕皇太子出奔冀寧下令討孛羅帖木兒孛羅帖木兒怒嗾監察御史武起宗言后外撓國政奏帝宜遷后出于外帝不荅二十五年三月遂矯制幽于諸色總管府令其黨姚伯顏不花守之四月庚寅孛羅帖木兒逼后還宮取印章僞爲后書召太子后仍

回幽所後又數納美女於孛羅帖木兒至百日始還宮及孛羅帖木兒死召皇太子還京師后傳旨令廓擴帖木兒以兵擁皇太子入城欲脅帝禪位廓擴帖木兒知其意至京城三十里外卽遣軍還營皇太子復銜之事見廓擴帖木兒傳會伯顏忽都皇后崩十二月中書省臣奏言后宜正位中宮帝不荅又奏改資政院爲崇政院而中政院亦兼主之帝乃授之冊寶其冊文曰坤以承乾元人道莫先於夫婦后以母天下王化實始於家邦典禮之常古今攸重咨爾肅良合氏篤生名族來事朕躬儆戒相成每勤於夙夜恭儉率下多歷於歲年旣

發祥元子於儲闈復流慶孫枝於甲觀眷若中宮之位  
允宜淑配之賢宗戚大臣況僉言而敷請掖庭諸御咸  
傾望以推尊乃屢遜辭尤可嘉尚今遣攝太尉某持節  
授以玉冊玉寶命爾爲皇后於戲慎修壺政益勉爾輔  
佐之心昭嗣徽音同保我延洪之福其欽寵命以衍壽  
祺二十八年從帝北奔

元史卷一百十四


元史卷一百十四考證

卜魯罕皇后傳伯岳吾氏○


臣祖庚

按武宗紀作伯要

真氏



元史卷一百十四考證



元史卷一百十五

明翰林學士亞中大夫知制誥兼修國史宋 濂等修

列傳第二

睿宗

睿宗景襄皇帝諱拖雷太祖第四子太宗母弟也方太祖崩時太宗留霍博之地國事無所屬拖雷實身任之聞燕京盜賊白晝剽掠富民財物吏不能禁遂遣塔察吾圖撒合里往窮治之殺十有六人盜始屏息己丑夏太宗還京八月卽位明年庚寅秋太宗伐金命拖雷帥師以從破天城堡拔蒲城縣聞金平章合達參政蒲阿

守西邊遂渡河攻鳳翔會前兵戰不利從太宗援之合  
達乃退辛卯春破洛陽河中諸城太宗還官山大會諸  
侯王謂曰人言耗國家者實由寇敵今金未殄實我敵  
也諸君寧無計乎拖雷進曰臣有愚計非衆可聞太宗  
屏左右亟臨問之其言秘人莫知也鳳翔既下有降人  
李昌國者言金主遷汴所恃者黃河潼關之險爾若出  
寶雞入漢中不一月可達唐鄧金人聞之寧不謂我師  
從天而下乎拖雷然之言於太宗太宗大喜語諸王大  
臣曰昔太祖嘗有志此舉今拖雷能言之真賽因也賽  
因猶華言大好云遂大發兵太宗以中軍自碗子城南

下渡河由洛陽進幹陳那顏以左軍由濟南進而拖雷  
總右軍自鳳翔渡渭水過寶雞入小潼關涉宋人之境  
沿漢水而下期以明年春俱會于汴遣搠不罕詣宋假  
道且約合兵宋殺使者拖雷大怒曰彼昔遣苟夢玉來  
通好遽自食言背盟乎乃分兵攻宋諸城堡長驅入漢  
中進襲四川陷閬州過南部而還遂由金取房前鋒三  
千人破金兵十餘萬于武當山趨均州乘騎浮渡漢水  
遣夔曲涅率千騎馳白太宗太宗方詣漢水將分兵應  
之會夔曲涅至卽遣慰諭拖雷亟合兵焉拖雷既渡漢  
金大將合達設伏二十餘萬于鄧州之西據隘待之時

拖雷兵不滿四萬及得諜報乃悉留輜重輕騎以進十二月丙子及金人戰于禹山佯北以誘之金人不動拖雷舉火夜行金合達聞其且至退保鄧州攻之三日不下遂將而北以三千騎命札剌等率之爲殿明日大霧迷道爲金人所襲殺傷相當拖雷以札剌失律罷之而以野里知給歹代焉未幾敗金軍壬辰春合達等知拖雷已北合步騎十五萬躡其後拖雷按兵遣其將忽都忽等誘之日且暮令軍中曰毋令彼得休息宜夜鼓譟以擾之太宗時亦渡河遣親王口溫不花等將萬餘騎來會天大雨雪金人僵凍無人色幾不能軍拖雷卽欲

擊之諸將請俟太宗至破之未晚拖雷曰機不可失彼脫入城未易圖也况大敵在前敢以遺君父乎遂奮擊于三峰山大破之追奔數十里流血被道資仗委積金之精銳盡於此矣餘衆迸走睢州伏兵起又敗之合達走鈞州僅遺數百騎蒲阿走汴至望京橋復禽獲之太宗尋至按行戰地顧謂拖雷曰微汝不能致此捷也諸侯王進曰誠如聖諭然拖雷之功著在社稷蓋又指其定冊云爾拖雷從容對曰臣何功之有此天之威皇帝之福也聞者服其不伐從太宗攻鈞州拔之獲合達攻許州又拔之遂從太宗收定河南諸郡四月由半渡入

真定過中都出北口住夏于官山五月太宗不豫六月疾甚拖雷禱于天地請以身代之又取巫覡祓除釁滌之水飲焉居數日太宗疾愈拖雷從之北還至阿刺合的思之地遇疾而薨壽四十有闕妃怯烈氏子十一人長憲宗次四則世祖也憲宗立追諡曰英武皇帝廟號睿宗二年合祭昊天后土以太祖睿宗配享世祖至元二年改諡景襄皇帝

### 裕宗

裕宗文惠明孝皇帝諱真金世祖嫡子也母昭睿順聖皇后弘吉烈氏少從姚樞竇默授孝經及終卷世祖大悅設食饗樞等中統三年封燕王守中書令丞相史天倪入啟事王曰我幼未嘗習祖宗典則閑於政體一旦當大任惟汝耆德賴焉復諭贊善王恂曰省臣所啟等國事也爾宜入與聞之四年兼判樞密院事至元初省臣奏請王署勅每月必再至中書於是王將入中書乳母進新衣笑却之曰吾何事美觀也嘗從幸宜興世祖違豫憂形于色夕不能寐聞母皇后暴得風疾卽悲泣衣不解帶而行七年秋受詔巡撫稱海至冬還京間謂諸王札刺忽及從官伯顏等曰吾屬適有茲暇宜各悉乃心慎言所守俾吾聞之於是撒里蠻曰太祖有訓欲

治身先治心欲責人先責己伯顏曰皇上有訓欺罔盜竊人之至惡一爲欺罔則後雖出善言人終弗信一爲盜竊則事雖未覺心常惴惴若捕者將至札刺忽曰我祖有訓長者稍深者底蓋言貴有終始長必極其杪深必究其底不可中輟也王曰皇上有訓毋持大心大心一持事卽隳敗吾觀孔子之語卽與聖訓合也至王恂陳說尤多事見恂傳十年二月立爲皇太子仍兼中書令判樞密院事受玉冊皇帝若曰咨爾皇太子真金仰惟太祖皇帝遺訓嫡子中有克嗣服繼統者豫選定之是用立太宗英文皇帝以紹隆丕構自時厥後爲不顯

立冢嫡遂啟爭端朕上遵祖宗宏規下協昆弟僉同之議乃從燕邸卽立爾爲皇太子積有日矣比者儒臣敷奏國家定立儲嗣宜有冊命此典禮也今遣攝太尉左丞相伯顏持節授爾玉冊金寶於戲聖武燕謀爾其承奉昆弟宗親爾其和協使仁孝顯于躬行抑可謂不負所托矣尚其戒哉勿替朕命九月丙戌詔立宮師府設官屬三十有八員起處士楊恭懿于京兆太子嘗有疾世祖臨幸親和藥以賜之遣侍臣李衆馳祀嶽瀆各山川太子戒其所至郡邑毋煩吏迎送重擾民也詔以侍衛親軍萬人益隸東宮太子命王慶端董士亨選其驍

勇者教以兵法時閱試焉太子服綾袷爲瀋所漬命侍  
臣重加染治侍臣請織綾更製之太子曰吾欲織百端  
非難也顧是物未敝豈宜棄之東宮香殿成工請鑿石  
爲池如曲水流觴故事太子曰古有肉林酒池爾欲吾  
效之耶不許每與諸王近臣習射之暇輒講論經典若  
資治通鑑貞觀政要王恂許衡所述遼金帝王行事要  
略下至武經等書從容片言之間苟有允愜未嘗不爲  
之灑然改容時侍經幄者如王恂白棟皆朝夕不出東  
宮而待制李謙太常宋衡尤加咨訪蓋無間也十八年  
正月昭睿順聖皇后崩太子自獵所奔赴勺飲不入口

者終日設廬帳居之命宋衡擇可備顧問者衡以郭祐  
何瑋徐琰馬紹揚居寬何榮祖楊仁風等爲言太子曰  
是數人者盡爲我致之宜自近者始遂召瑋于易州琰  
于東平贊善王恂卒太子聞之嗟悼賻鈔二千五百緡  
一日顧謂左右曰王贊善當言必言未嘗顧惜隨事規  
正良多裨補今鮮有其匹也時阿合馬擅國重柄太子  
惡其姦惡未嘗少假顏色盜知阿合馬所畏憚者獨太  
子爾因爲僞太子夜入京城召而殺之及和禮霍孫入  
相太子曰阿合馬死於盜手汝任中書誠有便國利民  
者毋憚更張苟或沮撓我當力持之中書啟以何瑋參

議省事徐琰爲左司郎中瑋琰入見太子諭之曰汝等  
學孔子之道今始得行宜盡平生所學於行之辟楊仁  
風于潞州馬紹于東平復辟楊恭懿置省中議事以衛  
輝總管董文用練達官政與恭懿同置省中按察副使  
王暉進承華事略一曰廣孝二曰立愛三曰端本四曰  
進學五曰擇術六曰謹習七曰聽政八曰達聰九曰撫  
軍十曰明分十一曰崇儒十二曰親賢十三曰去邪十  
四曰納誨十五曰幾諫十六曰從諫十七曰推惡十八  
曰尚儉十九曰戒逸二十曰審官太子聞漢成帝不絕  
馳道唐肅宗改絳紗袍爲朱明服大喜曰使吾行之亦

當若此及說邢峙止齊太子食邪蒿顧宮臣曰菜名邪  
蒿未必果邪也雖食之豈遽使人不正耶張九思對曰  
古人設戒義固當爾詔割江西龍興路爲太子分地太  
子謂左右曰安得治民如邢州張耕者乎誠使之往治  
俾江南諸郡取法民必安集於是召宋衛大選署守長  
江西行省以歲課羨餘鈔四十七萬緡獻太子怒曰朝  
廷令汝等安治百姓百姓安錢糧何患不足百姓不安  
錢糧雖多安能自奉乎盡卻之阿里以民官兼課司請  
歲附輸羊三百太子以其越例罷之參政劉思敬遣其  
弟思恭以新民百六十戶來獻太子問民所從來對曰

元史卷一百一十五 及傳  
七  
思敬征重慶時所俘獲者太子蹙然曰歸語汝兄此屬  
宜隨所在放遣爲民毋重失人心烏蒙宣撫司進馬踰  
歲獻之額卽諭之曰去歲嘗俾勿多進馬恐道路所經  
數勞吾民也自今其勿復然二十年春辟劉因子保定  
因以疾辭固辟之乃至拜右贊善大夫以吏部郎中夾  
谷之奇爲左贊善大夫是時已立國子學李棟宋衛李  
謙皆以東宮僚友繼典教事至是命因專領之而以衛  
等仍備咨訪嘗曰吾聞金章宗時有司論太學生廩費  
太多章宗謂養出一范文正公所償顧豈少哉其言甚  
善會因復以疾乞去二十二年以長史耶律有尙爲國

子司業中庶子伯必以其子阿八赤入見諭令入學伯  
必卽令其子入蒙古學逾年又見太子問讀何書其子  
以蒙古書對太子曰我命汝學漢人文字耳其亟入胄  
監遣使辟宋工部侍郎倪堅于開元旣至訪以古今成  
敗得失堅對言三代得天下以仁其失也以不仁漢唐  
之亾也以外戚鬪堅宋之亾也以姦黨權臣太子嘉納  
賜酒日昃乃罷諭德李謙夾谷之奇嘗進言曰殿下睿  
性夙成閱理久熟方遵聖訓參決庶務如視膳問安之  
禮固無待於贊諭至於軍民之利病政令之得失事關  
朝廷責有臺院有非宮臣所宜言者獨有澄原固本保

守成業殿下所當留心臣等不容緘口者也敬陳十事  
曰正心曰睦親曰崇儉曰親賢曰幾諫曰戢兵曰尚文  
曰定律曰正名曰革敝其論正心有云太子之心天下  
之本也太子心正則天心有所屬人心有所繫矣唐太  
宗嘗言人主一心攻之者衆或以勇力或以辨口或以  
諂諛或以姦詐或以嗜欲輻輳攻之各求自售人主少  
懈而受其一則其害有不可勝言者殿下至尊之儲貳  
人求自售者亦不爲少須常喚醒此心不使爲物欲所  
撓則宗社生靈之福固本澄原莫此爲切論睦親以宗  
親爲王室之藩屏人主之所自衛者也大分既定尊卑  
懸殊必恩意俯逮然後得盡其歡心宗親之歡心得則  
遠近之歡心得矣其論正名革敝尤切中時政太子在  
中書日久明於聽斷四方州郡科徵輓漕造作和市有  
係民休戚者聞之卽日奏罷右丞盧世榮以言利進太  
子意深非之嘗曰財非天降安得歲取贏乎恐生民膏  
血竭於此也豈惟害民實國之大蠹其後世榮果坐罪  
桑哥素主世榮聞太子有言訖箝口不敢掇至元以來  
天下臻於太平人材輩出太子優禮遇之在師友之列  
者非朝廷名德則布衣節行之士德意未嘗少衰宋衛  
目疾賜鈔千五百緡王磐告老而歸官其婿於東平以

終養孔洙自江南入覲則責張九思學聖人之道不知有聖人之後其大雅不羣本於天性中外歸心焉於是世祖春秋高江南行臺監察御史言事者請禪位於太子太子聞之懼臺臣寢其奏不敢遽聞而小人以臺臣隱匿乘間發之世祖怒甚太子愈益懼未幾遂薨壽四十有三成宗卽位追諡曰文惠明孝皇帝廟號裕宗祔于太廟

### 顯宗

顯宗光聖仁孝皇帝諱甘麻刺裕宗長子也母曰徽仁裕聖皇后弘吉刺氏甘麻刺少育於祖母昭睿順聖皇

后日侍世祖未嘗離左右畏慎不妄言言必無隱至元中奉旨鎮北邊叛王岳木忽兒等聞其至望風請降旣而都阿察八兒諸王遣使求和邊境以寧嘗出征駐金山會大雪擁火坐帳內歡甚顧謂左右曰今日風雪如是吾與卿處猶有寒色彼從士亦人耳腰弓矢荷刃周廬之外其苦可知遂命饗人大爲肉糜親嘗而徧賜之撫循部曲之暇則命也滅堅以國語講通鑑戒其近侍太不花曰朝廷以藩屏寄我事有不逮正在汝輩輔助其或依勢作威不用我命輕者論遣大者奏聞耳宜各慎之使百姓安業主上無北顧之憂則子與卿等亦樂

處於此乃所以報國家也二十六年世祖以其居邊日久特命獵于柳林之地率衆至朔州恐廩膳不均令左右司之分給從士仍飭其衆曰汝等飲食旣足若復侵漁百姓是汝自取罪譴無悔衆皆如約民賴以安北還覲世祖于上京世祖勞之曰汝在柳林民不知擾朕實嘉焉明年冬封梁王授以金印出鎮雲南過中山又明年春過懷孟從卒馬馳之屬不下千百計所至未嘗橫取於民二十九年改封晉王移鎮北邊統領太祖四大斡耳朵及軍馬達達國土更鑄晉王金印授之中書省臣言于世祖曰諸王皆置傳今晉王守太祖肇基之地

視諸王宜有加請置內史世祖從之遂以北安王傅禿歸梁王傅木八刺沙雲南行省平章賽陽並爲內史明年置內史府又明年世祖崩晉王聞訃奔赴上都諸王大臣咸在晉王曰昔皇祖命我鎮撫北方以衛社稷久歷邊事願服厥職母弟鐵木兒仁孝宜嗣大統於是成宗卽帝位而晉王復歸藩邸元貞元年塔塔兒部年穀不熟檄宣徽院賑之又荅荅刺民饑請朝廷賑之詔賜王鈔千萬貫及銀帛有差皇太后復以雲南所貢金器遣朶年來賜是歲冬奉詔以知樞密院事札散同知徽政院事阿里罕爲內史大德二年詔給秣米五百石五

年成宗以邊士貧乏分給鈔一千萬貫六年正月乙巳  
王薨年四十王天性仁厚御下有恩元貞初藩邸屬官  
審伯年老請以其子代之內史言於王王曰惟天子所  
命其自守如此故尤爲朝廷所重然崇尚浮屠命僧作  
佛事歲耗財不可勝計子三人曰也孫帖木兒曰松山  
曰迭里哥兒不花王薨後十年仁宗卽位諡王獻武又  
十一年英宗遇弒也孫帖木兒以嗣晉王卽皇帝位追  
尊曰光聖仁孝皇帝廟號顯宗祔享太室又六年文宗  
卽位乃毀其廟室

### 順宗

順宗昭聖衍孝皇帝諱荅刺麻八刺裕宗第二子也母  
曰徽仁裕聖皇后弘吉刺氏至元初裕宗爲燕王荅刺  
麻八刺生于燕邸明年詔裕宗居潮河八月召至京師  
凡乘輿巡幸及歲時朝賀未嘗不侍裕宗以行稍長世  
祖賜女侍郭氏其後乃納弘吉刺氏爲妃二十二年裕  
宗薨荅刺麻八刺以皇孫鍾愛兩宮優其出閣之禮二  
十八年始詔出鎮懷州以侍衛都指揮使梭都尙書王  
倚從行至趙州從卒有伐民桑棗者民遮訴于道荅刺  
麻八刺怒杖從卒以懲衆遣王倚入奏世祖大悅未至  
以疾召還明年春世祖北幸留治疾京師越兩月而薨

年二十有九子三人長曰阿木哥封魏王郭出也妃所  
生者曰海山是爲武宗曰愛育黎穡力八達是爲仁宗  
大德十一年秋武宗卽位追諡曰昭聖衍孝皇帝廟號  
順宗祔享太廟

元史卷一百十五

元史卷一百十六

明翰林學士中大夫知制誥兼修國史宋

濂等修

列傳第三

后妃

睿宗顯懿莊聖皇后名唆魯帖尼怯烈氏生子憲宗世  
祖相繼爲帝至元二年追上尊諡莊聖皇后升祔睿宗  
廟至大二年十二月加諡顯懿莊聖皇后三年十月又  
上玉冊其文曰祖功宗德稱誅於天內則闡儀受成於  
廟行之大者名必顯恩之隆者報則豐上以增佐定之  
光下以伸適追之孝欽惟莊聖皇后英明溥博聖善承

嘉尊儷景襄陰教純被逮事光獻婦職勤修勳聿著於承天祥兩占於夢日跡聖緒洪源之有漸知深仁厚澤之無垠立符肇自塗山顧前徽之未稱蒼籙興於文母豈後嗣之能忘是用叅攷彝經丕揚景樂敷繹寶慈之誼形容青史之規謹遣攝太尉某奉玉冊玉寶加上尊諡曰顯懿莊聖皇后伏惟睿靈昭垂鑒格禮嚴闕宮樂歌夷則億萬斯年承休無斃

裕宗徽仁裕聖皇后伯藍也怯赤一名闊闊真弘吉刺氏生順宗成宗先是世祖出田獵道渴至一帳房見一女子緝駝茸世祖從覓馬湏女子曰馬湏有之但我父

母諸兄皆不在我女子難以與汝世祖欲去之女子又曰我獨居此汝自來自去於理不宜我父母卽歸姑待之須臾果歸出馬湏飲世祖世祖旣去歎息曰得此等女子爲人家婦豈不美耶後與諸臣謀擇太子妃世祖俱不允有一老臣嘗知向者之言知其未許嫁言于世祖世祖大喜納爲太子妃后性孝謹善事中宮世祖每稱之爲賢德媳婦侍昭睿順聖皇后不離左右至溷廁所用紙亦以面擦令柔軟以進一日裕宗有病世祖往視見牀上設織金臥褥世祖愠而語之曰我嘗以汝爲賢何乃若此耶后跪荅曰常時不曾敢用今爲太子病

恐有濕氣因用之卽時徹去世祖崩成宗至上都諸王  
畢會先是御史中丞崔彧得玉璽于木華黎國王曾孫  
世德家其文曰受命于天旣壽永昌上之于后至是后  
手授成宗卽皇帝位尊后爲皇太后冊文曰自家而國  
治道必有所先立愛惟親君德莫先於孝況恩深於鞠  
我而禮重於正名歷代以來令儀可考人子之職所在  
天下之母宜尊恭惟聖母聖善本乎天資靜專法乎地  
道上以奉宗祏之重下以敘倫紀之常助我前人守卷  
耳憂勤之志保予冲子成思齊雍肅之風肆神器之有  
歸知孫謀之素定畀付雖由於歷數規摹一出於庭闈

是用率籲衆心章明鉅度不勝拳拳大願謹奉冊寶上  
尊稱曰皇太后伏惟長信穆穆周宗綿綿備洛書之錫  
福粲慈極之儀天瑤圖寶運於萬斯年命設官屬置徽  
政院後院官有受獻浙西田七百頃籍於位下太后曰  
我寡居婦人衣食自有餘況江南率土皆國家所有我  
曷敢私之卽命中書省盡易院官之受獻者后之弟欲  
因后求官后語之曰若欲求官耶汝自爲之勿以累我  
也其後弟果被黜人皆服后之先見大德四年二月崩  
祔葬先陵諡曰裕聖皇后升祔裕宗廟至大三年十月  
又追尊諡曰徽仁裕聖皇后

顯宗宣懿淑聖皇后名普顏怯里迷失弘吉刺氏顯宗居晉邸納爲元妃生泰定帝泰定元年追尊宣懿淑聖皇后其冊文曰祇纘皇圖方弘仁孝之化追崇聖母永懷鞠育之恩匪建鴻名疇彰厚德欽惟皇妣晉王妃弘吉刺氏淑侔周妣賢邁虞嬪儷我先王恪守肇基之地昭其懿範益恢正始之風順坤道以承乾炯月輝以遡日陰功久積衍聖緒於無疆神器攸歸知慶源之有自仰徽音之如在慨至養之莫加聿選休辰爰修縟典謹遣攝太尉某奉玉冊玉寶上尊諡曰宣懿淑聖皇后伏惟淑靈在上式垂鑒臨合享太宮永錫繁祉升祔皇考

顯宗廟天歷初復祧顯宗廟祀

順宗昭獻元聖皇后名荅已弘吉刺氏按陳孫渾都帖木兒之女裕宗居燕邸及潮河順宗俱在侍稍長世祖賜女侍郭氏後乃納后爲妃生武宗及仁宗大德九年成宗不豫卜魯罕皇后秉政遣仁宗母子出居懷州十年十二月后至懷州十一年正月成宗崩時武宗總兵北邊左丞相荅刺罕哈刺哈孫陰遣使報仁宗與后奔還京師后與仁宗入內哭復出居舊邸朝夕入奠卽遣使迎武宗還以五月卽位先是太后以兩太子星命付陰陽家推算問所宜立對曰重光大荒落有災旃蒙作

噩長久重光爲武宗生年旃蒙爲仁宗生年太后頗惑其言遣近臣朶耳諭旨武宗曰汝兄弟二人皆我所出豈有親疎陰陽家所言運祚修短不容不思也武宗聞之默然進康里脫脫而言曰我捍北邊十年又膺次居長太后以星命爲言茫昧難信使我設施合於天心民望雖一日之短亦足垂名萬世何可以陰陽家言而乖祖宗之託哉脫脫以聞太后愕然曰修短之說雖出術家吾爲太子遠慮所以深愛太子也太子旣如是言今當速來耳詳見康里脫脫傳中五月武宗旣立卽日尊太后爲皇太后立仁宗爲皇太子三宮協和十一月帝

朝太后于隆福宮上皇太后玉冊玉寶至大元年三月帝爲太后建興聖宮給鈔五萬錠絲二萬觔二年正月太后幸五臺山作佛事詔高麗王璋從之四月立興聖宮江淮財賦總管府以司太后錢糧三年二月以上皇太后尊號告祀南郊四月以興聖宮鷹坊等戶四千分處遼陽建萬戶府統之十月戊申帝率皇太子諸王羣臣朝興聖宮上皇太后尊號冊寶曰儀天興聖慈仁昭懿壽元皇太后庚戌后恭謝太廟以皇太后受尊號詔赦天下四年仁宗卽位延祐二年三月帝率諸王百官奉玉冊玉寶加上皇太后尊號曰儀天興聖慈仁昭懿

壽元全德泰寧福慶皇太后延祐七年英宗卽位十二  
月上尊號太皇太后冊文云王政之先無以加孝人倫  
之本莫大尊親肆予臨御之初首舉推崇之典恭惟太  
皇太后陛下仁施溥博明燭幽微爰自居淵潛之宮已  
有母天下之望方武宗之北狩適成廟之賓天旋克振  
於乾綱諒再安於宗祏雖有在躬之歷數實司創業之  
艱難儀式表於慈闈動協謀於先帝莫究補天之妙允  
如扶日之升位履至尊兩翼成於聖子嗣登大寶復擁  
佑於眇躬矧德邁塗山功高文母是宜加於四字式益  
衍於徽稱謹奉玉冊玉寶加上尊號曰儀天興聖慈仁

昭懿壽元全德泰寧福慶徽文崇佑太皇太后於戲茲  
雖涉於強名庶庸申於善頌九州四海養未足於孝心  
萬歲千秋願永膺於壽祉丙辰太后御大明殿受朝賀  
戊辰告太廟太后見明宗少時有英氣而英宗稍柔懦  
諸羣小以立明宗必不利於己遂擁立英宗及旣卽位  
太后來賀英宗卽毅然見於色后退而悔曰我不擬養  
此兒耶遂飲恨成疾至治三年二月崩升祔順宗廟配  
食后性聰慧歷佐三朝教宮中侍女皆執治女功親操  
井臼然不事檢飭自正位東朝滯恣益甚內則黑驢母  
亦烈失八用事外則幸臣失烈門紐隣及時宰迭木帖

元史卷一百十六  
兒相率爲姦以至箠辱平章張珪等濁亂朝政無所不  
至及英宗立羣倖伏誅而後勢燄頓息焉


元史卷一百十六

元史卷一百十六考證


顯懿莊聖皇后傳至元二年追上尊諡莊聖皇后○

臣

祖庚  
按本紀作莊獻



元史卷一百十六考證



元史卷一百十七

明翰林學士亞中大夫知制誥兼修國史宋 濂等修

列傳第四

別里古台

宗王別里古台者烈祖之第五子太祖之季弟也天性純厚明敏多智畧不喜華飾軀幹魁偉勇力絕人幼從太祖平諸部落掌從馬國法常以腹心遇敗則牽從馬其子孫最多居處近太祖行在所南接按只台營地嘗從太祖宴諸部族或潛圖害別里古台以刀斫其臂傷甚帝大怒欲索而誅之別里古台曰今將舉大事於天

下其可以臣故而生釁隙哉且臣雖傷甚幸不至死請  
勿治帝尤賢之當創業之初征取諸國王未嘗不在軍  
中摧鋒陷陣不避艱險帝嘗曰有別里古台之力哈撒  
兒之射此朕之所以取天下也其見稱如此嘗立爲國  
相又長扎魯火赤別授之印賜以蒙古百姓三千戶及  
廣寧路恩州二城戶一萬一千六百三以爲分地又以  
斡難怯魯之地建營以居江南平加賜信州路及鉛山  
州二城戶一萬八千王薨子曰罕秃忽曰也速不花曰  
口温不花罕秃忽性剛猛知兵從憲宗征伐多立戰功  
及攻釣魚山而還道由河南招來流亡百餘戶悉以入

籍罕秃忽子曰霍歷極以疾廢不能軍世祖俾居于恩  
以統其藩人至大三年霍歷極薨子塔出嗣塔出性温  
厚謙恭好學通經史能撫恤其民云也速不花子曰爪  
都中統三年始以推戴功封廣寧王至元十三年賜銀  
印口温不花領兵河南屢建大功子曰滅里吉台甕吉  
刺台

### 朮赤

朮赤者太祖長子也國初以親王分封西北其地極遠  
去京師數萬里驛騎急行二百餘日方達京師以故其  
地郡邑風俗皆莫得而詳焉朮赤薨子拔都嗣拔都薨

弟撒里荅嗣撒里荅薨弟忙哥帖木兒嗣忙哥帖木兒  
薨弟脫脫忙哥嗣脫脫忙哥薨弟脫脫嗣脫脫薨弟伯  
忽嗣伯忽薨弟月卽別嗣至元二年月卽別遣使來求  
分地歲賜以賑給軍站京師元無所領府治三年中書  
請置總管府給正三品印至大元年月卽別薨子札尼  
別嗣其位下舊賜平陽晉州永州分地歲賦中統鈔二  
千四百錠自至元五年己卯歲始給之

### 秃刺

秃刺太祖次子察合台四世孫也少以勇力聞大德十  
一年春成宗崩左丞相阿忽台等潛謀立安西王阿難

荅而推皇后伯岳吾氏稱制中外洵洵仁宗歸自懷孟  
引秃刺入內縛阿忽台等以出誅之大事遂定武宗卽  
位第功封越王賜金印以紹興路爲其分地秃刺居常  
怏怏有怨望意至大元年秋武宗幸涼亭將御舟秃刺  
前止之帝曰爾何如朕欲登舟秃刺曰人有常言一箭  
中麋母曰自能百兎未得未可遽止此蓋國俗儕輩相  
靳之語而秃刺言之武宗由是銜焉旣而大宴萬歲山  
秃刺醉起解其腰帶擲諸地嗔目謂帝曰爾與我者止  
此爾帝益疑其有異志二年春命楚玉牙忽都丞相脫  
脫平章赤因鐵木兒鞠之辭服遂伏誅子西安王阿剌

武納失里天歷初以推戴功進封豫王

### 牙忽都

牙忽都祖父撥綽睿宗庶子也撥綽之母曰馬一實乃馬真氏撥綽驍勇善騎射憲宗命大將軍北征欽察有功賜號拔都歲丁巳分土諸侯王賜蠶州三千三百四十七戶爲其食邑撥綽娶察渾滅兒乞氏生薛必烈傑兒薛必烈傑兒娶弘吉刺氏生牙忽都牙忽都年十三世祖命襲其祖父統軍至元十二年從北安王北征十三年失列吉叛遣人誘脅之牙忽都不從事王益忠謹八魯渾拔都兒粘闔與海都通相率引去王遣牙忽都

將兵追之擒八魯渾等以獻未幾失列吉約木忽兒脫帖木兒等反以兵攻王脫帖木兒生致牙忽都使失列吉拘繫之牙忽都與王親臣那台等謀逃歸事覺那台等被殺復繫牙忽都困辱備至十四年兀魯兀台伯顏帥師討叛失列吉約木忽兒迎戰牙忽都潛結赤斤帖木兒禿禿哈亂其陣失列吉軍亂因得脫走見帝鬚髮盡白帝閔之賞賚甚厚至元十八年加封耒陽州五千三百四十七戶二十一年命與禿禿哈同討海都牙忽都先進邏得謀人知其虛實直前衝敵陣破其精兵海都敗走得所俘掠軍民而還朶兒朶哈上其功詔賜鈔

幣鎧甲弓矢其後北安王駐帖木兒河乃顏也不堅有  
異圖也不堅引兵趨怯綠憐河大帳王遣闊闊出禿禿  
哈率衆追之那懷之民擾攘不知所從牙忽都將三百  
騎進至阿赤怯地會王帳下遜篤思部兵逃去牙忽都  
諭之使還時怯必禿忽兒霍台誘蒙古軍二萬從乃顏  
牙忽都知之夜襲其河上軍突入帳中遇忽都滅兒堅  
幾獲之間道逸去二十七年海都入寇時朶兒朶哈方  
居守大帳詔遣牙忽都同力備禦軍未戰而潰牙忽都  
妻帑輜重駐不思哈刺嶺上悉爲藥木忽兒明理帖木  
兒所掠牙忽都與其子脫列帖木兒相失獨與十三騎

奔還世祖撫慰嘉歎賜爵鎮遠王塗金銀印以弘吉刺  
氏女賜之資裝特厚復命納里忽徹徹不花往錫命其  
部屬同時被剽掠者以故相桑哥家財分賜之仍各賜  
白金五十兩珠子一酒卮鈔幣稱是又命牙忽都居北  
安王第二帳王薨帝命掌大帳固辭成宗立命牙忽都  
常侍左右武宗撫兵漠北請以子脫列帖木兒從大德  
五年海都篤哇合軍入寇脫列帖木兒將兵千人擁護  
先後力戰功多在軍十年成宗崩安西王阿難荅與明  
理帖木兒窺望神器牙忽都曰世祖皇帝之嫡孫在神  
器所當屬安西藩王也入繼非制武宗卽位以其父子

元史卷一百一十七 列傳  
五  
勞効忠勤益厚遇之進封楚王賜金印置王傅以駙馬  
都尉都刺哈之女弟弘吉烈氏爲楚王妃又以叛王察  
八兒親屬賜之脫列帖木兒襲封鎮遠王至大三年察  
八兒來歸宗親皆會牙忽都進曰太祖皇帝削平四方  
惟南土未定列聖嗣位未遑統一世祖皇帝混一四海  
顧惟宗室諸王弗克同堂而燕今陛下洪福齊天拔都  
罕之裔首已附順叛王察八兒舉族來歸人民境土悉  
爲一家地大物衆有可恃者焉有不可恃者焉昔我太  
祖有訓世祖誦之臣與有聞治亂國者宜以法齊之所  
以辨上下定民志今請有以整飭之則人將有所勸懲

惟陛下鑒之帝嘉納其言牙忽都薨仁宗命脫列帖木  
兒嗣楚王延祐中明宗西出脫列帖木兒坐累徙西番  
沒入其家貲之半明宗卽位制曰脫列帖木兒何罪其  
轉徙籍沒豈不以我故耶其復故號人民貲帑悉歸之  
脫列帖木兒薨子八都兒立八都兒薨有子三人曰燕  
帖木兒曰速哥帖木兒曰朶羅不花燕帖木兒嗣時年  
十有二妃弘吉刺氏哈只兒駙馬之女孫速哥失里皇  
后之從妹也

寬徹普化

寬徹普化世祖之孫鎮南王脫歡子也泰定三年封威

元史卷一百一十七 列傳  
順王鎮武昌賜金印撥付怯薛丹五百名又自募至一  
千名設王傅官屬湖廣行省供億錢糧衣裝歲支米三  
萬石錢三萬二千錠又日給王子諸妃飲饍文宗天歷  
初賜寬徹普化金銀各五十兩幣三十匹仍鎮湖廣而  
寬徹普化縱怯薛等官侵奪民利民頗患苦之至元五  
年太師伯顏矯制召赴京貶之及脫脫爲相始明其無  
辜命復還鎮至正二年湖北廉訪司糾言寬徹普化恃  
以宗室恣行不法不報十一年徐壽輝爲亂起蘄黃寬  
徹普化與其子別帖木兒荅帖木兒引兵至金剛臺壽  
輝部將倪文俊敗之執別帖木兒十二年壽輝僞將鄒

普勝陷武昌寬徹普化與湖廣行省平章和尚棄城走  
詔追奪寬徹普化印而誅和尚十三年湖廣行省參知  
政事阿魯輝克復武昌及漢陽寬徹普化復率領王子  
并本部怯薛丹屢討賊立功十四年詔寬徹普化復鎮  
武昌還其印十六年命寬徹普化與宣讓王帖木兒不  
花以兵鎮邊懷慶各賜黃金一錠白金五錠幣帛九匹  
鈔二十錠未幾復還武昌命其子報恩奴接待奴佛家  
奴以大船四十餘隻水陸並進至沔陽攻徐壽輝僞將  
倪文俊且載如妾以行兵至漢川縣鷄鳴汊水淺船閣  
不能行文俊以火筏盡焚其船接待奴佛家奴皆遇害

而報恩奴自死如妾皆陷寬徹普化走陝西二十五年  
侯伯顏荅失奉寬徹普化自雲南經蜀轉戰而去至成  
州欲之京師李思齊以取蜀爲名扼不令行俾屯田于  
成州以没其子曰和尙者封義王侍從順帝左右多著  
勞効帝出入常與俱至正二十四年索羅帖木兒稱兵  
犯闕遂爲中書右丞相總握國柄恣爲淫虐和尙心忿  
其無君數爲帝言之受密旨與儒士徐士本謀交結勇  
士上都馬金那海伯顏達兒帖古思不花火你忽都洪  
寶寶黃哈刺八禿龍從雲陰圖刺孛羅帖木兒帝期以  
事濟放鴿鈴爲號徐士本掌之明年七月孛羅帖木兒  
入奏事行至延春閣李樹下伯顏達兒自衆中奮出斫  
孛羅帖木兒中其腦上都馬等競前斫死之詳見索羅  
帖木兒傳二十八年順帝將北奔詔准王帖木兒不花  
監國而以和尙佐之及京城將破卽先遁不知所之

帖木兒不花

帖木兒不花世祖孫鎮南王脫歡第四子也初世祖第  
九子脫歡以討安南無成功終身不許見遂封鎮南王  
出鎮揚州脫歡薨子老章襲封鎮南王老章薨弟脫不  
花襲封鎮南王脫不花薨子孛羅不花幼帖木兒不花  
乃嗣爲鎮南王文宗天歷初賜帖木兒不花黃金五十

兩白金五十兩幣三十匹二年孛羅不花已長帖木兒不花請以其位復還孛羅不花朝廷以其讓而不居也改封宣讓王賜金印移鎮於廬州順帝至元元年撥廬州饒州牧地一百頃賜之二年賜市宅錢四千錠命其王府官凡班次列于有司之右五年伯顏擅權矯制貶帖木兒不花及威順王寬徹普化至脫脫爲相始言于帝明此兩王者皆無辜詔令復還鎮至正十二年廬州境內賊起淮西廉訪使陳思謙言于帖木兒不花曰王以帝室之胄鎮撫淮甸豈宜坐視且府中官屬及怯薛丹人等數甚多必有可使摧鋒陷陣者惟王圖之帖木

兒不花大悟其言曰此吾責也卽命以所部兵及諸王乞塔反等分道擊賊擒其渠帥廬州境內皆平帝聞之賜金帶銀鈔以賞其功十六年命帖木兒不花與寬徹普化以兵鎮遏懷慶路賜金銀各一錠幣帛九匹鈔二十錠旣而汝潁之寇南渡淮帖木兒不花復以便宜調芍陂屯軍拒之及廬州不守乃挈身北歸留京師二十七年進封淮王賜金印設王傅等官二十八年大明兵逼京師順帝北奔詔以帖木兒不花監國而拜慶童中書左丞相輔之俄而城破帖木兒不花死之年八十三

元史卷一百十七

元史卷一百十八

明翰林學士亞中大夫知制誥兼修國史宋

濂等修

列傳第五

特薛禪

特薛禪姓孛思忽兒弘吉剌氏世居朔漠本名特因從太祖起兵有功賜名薛禪故兼稱曰特薛禪女曰孛兒台太祖光獻翼聖皇后子曰按陳從太祖征伐凡三十二戰平西夏斷潼關道取回紇尋斯干城皆與有功歲丁亥賜號國舅按陳那顏壬辰賜銀印封河西王以統其國族丁酉賜錢二十萬緡有旨弘吉剌氏生女世以

爲后生男世尙公主每歲四時孟月聽讀所賜旨世世不絕又賜所俘獲軍民五千二百仍授萬戶以領之按陳薨葬官人山元貞元年二月追封濟寧王諡忠武妻哈真追封濟寧王妃子幹陳歲戊戌授萬戶尙睿宗女也速不花公主幹陳薨葬不海韓弟納陳歲丁巳襲萬戶奉旨伐宋攻釣魚山又從世祖南涉淮甸下大清口獲船百餘艘又率兵平山東濟兗單等州及阿里不哥叛中統二年與諸王北伐以其子哈海脫歡幹羅陳等十人自從至于莽來由失木魯與阿里不哥之黨八兒哈八兒思等戰追北至孛羅克禿復戰自旦及夕斬首

萬級僵尸被野薨葬末懷禿幹羅陳襲萬戶尙完澤公主完澤公主薨繼尙囊加真公主至元十四年薨葬拓刺里無子弟曰帖木兒至元十八年襲萬戶二十四年乃顏叛從帝親征以功封濟寧郡王賜白傘蓋以寵之二十五年諸王哈丹禿魯干叛與諸王及統兵官玉速帖木兒等率兵討之由龜刺兒河與哈丹等遇轉戰至惱木連河殲其衆帝賜名按察兒禿那顏以旌其功薨葬末懷禿子二人長曰琯阿不刺次曰桑哥不刺皆幼至元二十七年以其弟蠻子台襲萬戶亦尙囊加真公主成宗卽位封皇姑魯國大長公主以金印封蠻子台

爲濟寧王奉旨率本部兵討叛王海都篤哇旣與之遇  
方約戰行伍未定單騎突入陣中往復數四敵兵大擾  
一戰遂大捷時武宗在藩邸統大軍以鎮朔方有旨令  
蠻子台總領蒙古軍民官輔武守莽來以遏北方囊加  
眞公主薨繼尙裕宗女喃哥不刺公主蠻子台薨年五  
十有二大德十一年三月按荅兒長子瑯阿不刺襲萬  
戶尙祥哥刺吉公主六月封大長公主賜瑯阿不刺金  
印加封魯王至大二年賜平江稻田一千五百頃皇慶  
間加封皇姊大長公主天歷間加號皇姑徽文懿福眞  
壽大長公主至大三年瑯阿不刺薨葬末懷禿阿里嘉

室利瑯阿不刺嫡子也至大三年甫八歲襲萬戶四年  
七月襲封魯王尙朶兒只班公主元統元年阿里嘉室  
利薨至順間封朶兒只班號肅雍賢寧公主桑哥不刺  
者魯王瑯阿不刺之弟阿里嘉室利之叔也自幼奉世  
皇旨養于幹可彌公主所是爲不只兒駙馬後襲統其  
本部民四百戶成宗時奉旨尙普納公主至順間封鄆  
安大長公主授桑哥不刺金印封鄆安王職千戶元統  
元年授萬戶二年二月加封鄆安公主號皇姑大長公  
主加封桑哥不刺魯王以疾薨年六十一此皆以駙馬  
襲封王爵者也唆兒火都者亦按陳之子以從征功在

太祖朝遙授左丞相爲千戶仍賜以塗金銀章及金銀  
字海青圓符五驛馬券六其子曰阿哈駙馬當憲宗朝  
嘗率兵破徐州以功受賞黃金一錠白金十錠及銀鞍  
勒仍命襲父官至世祖時有詔弘吉刺萬戶所受驛券  
圓符皆仍其舊凡唆兒火都所受者宜皆收之而唆兒  
火都之諸孫若孛羅沙伯顏蠻子添壽不花大都不花  
掌吉等及阿哈千戶之孫曰也速達兒與按陳之弟名  
冊者在太祖世授官本藩蒙古軍站千戶冊之子曰哈  
兒哈孫以平金功賜號拔都兒哈兒哈孫之孫曰都羅  
兒至元四年授光祿大夫以銀章封懿國公有脫憐者

亦按陳之裔孫也世祖授本藩千戶仍賜驛券圓符各  
四令以兵守朔土之怯魯連二十四年從族父按荅兒  
禿征叛王乃顏有功亦賜號拔都兒脫憐卒子迸不刺  
嗣迸不刺卒子買住罕嗣買住罕尙拜荅沙公主卒弟  
孛羅帖木兒嗣以金章封也德王孛羅帖木兒薨買住  
罕孫阿失襲千戶有名丑漢者按陳次子必哥之裔孫  
尙台忽魯都公主仁宗朝封安遠王以兵守莽來有荅  
兒罕者亦特薛禪之裔孫也以從軍功世祖亦賜以拔  
都兒之號加賜黃金一錠其子曰不只兒從征乃顏禽  
其黨金家奴帝賞以金帶其後有曰伯奢者卽其孫也

又按陳之孫納合尙太宗峻兒哈罕公主火忽之孫不  
只兒尙幹可真公主又特薛禪諸孫有名脫羅禾者尙  
不魯罕公主繼尙闊闊倫公主此皆尙公主爲駙馬者  
也凡其女之爲后者自光獻翼聖皇后以降憲宗貞節  
皇后諱忽台及后妹也速兒皆按陳從孫忙哥陳之女  
世祖昭睿順聖皇后諱察必濟寧忠武王按陳之女其  
諱帖古倫者按陳孫脫憐之女諱喃必冊繼守正宮者  
納陳孫僊童之女成宗貞慈靜懿皇后諱實憐荅里幹  
羅陳之女也順宗昭獻元聖皇后諱荅吉大德十一年  
十一月武宗冊上皇太后至大三年十月加上尊號曰

儀天興聖慈仁昭懿壽元皇太后仁宗延祐二年加上  
尊號曰儀天興聖慈仁昭懿壽元全德泰寧福慶皇太  
后延祐七年又加徽文崇祐四字尊號太皇太后則按  
陳孫渾都帖木兒之女武宗宣慈惠聖皇后諱真哥脫  
憐子迸不刺之女其諱速哥失里者按陳從孫哈兒只  
之女泰定皇后諱八不罕按陳孫幹留察兒之女其諱  
必罕諱速哥荅里者皆脫憐孫買住罕之女文宗皇后  
諱不荅失里瑯阿不刺魯王之女此則弘吉刺氏之爲  
后者也初弘吉刺氏族居於苦烈兒溫都兒斤迭烈木  
兒也里古納河之地歲甲戌太祖在迭蔑可兒時有旨

分賜按陳及其弟火忽冊等農土

農土猶言經界也

若曰是苦

烈兒溫都兒斤以與按陳及哈撒兒爲農土申諭按陳曰可木兒溫都兒荅兒腦兒迭蔑可兒等地汝則居之諭冊曰阿刺忽馬乞迤東蒜吉納禿山木兒速拓哈海幹連直至阿只兒哈溫都哈老哥魯等地汝則居之當以胡盧忽兒河北爲鄰按赤台爲界又諭火忽曰哈老溫迤東塗河潢河之間火兒赤納慶州之地與亦乞列思爲隣汝則居之又諭按陳之子唆魯火都曰以汝父子能輸忠于國可木兒溫都兒迤東絡馬河至于赤山塗河迤南與國民爲隣汝則居之至至元七年幹羅陳

萬戶及其妃囊加真公主請于朝曰本藩所受農土在上都東北三百里荅兒海子實本藩駐夏之地可建城邑以居帝從之遂名其城爲應昌府二十二年改爲應昌路元貞元年濟寧王蠻子台亦尙囊加真公主復與公主請於帝以應昌路東七百里駐冬之地勅建城邑復從之大德元年名其城爲全寧路弘吉刺之分邑得任其陪臣爲達魯花赤者有濟寧路及濟兗單三州鉅野鄆城金鄉虞城碭山豐縣肥城任城魚臺沛縣單父嘉祥磁陽寧陽曲阜泗水二十六縣此丙申歲之所賜也至元六年陞古濟州爲濟寧府十八年始陞爲路而

濟兗單三州隸焉又汀州路長汀寧化清流武平上杭連城六縣此至元十三年之所賜也又有永平路灤州盧龍遷安撫寧昌黎石城樂亭六縣此至大元年之所賜也若平江稻田一千五百頃則至大二年所賜也其應昌全寧等路則自達魯花赤總管以下諸官屬皆得專任其陪臣而王人不與焉此外復有王傅府自王傅六人而下其羣屬有錢糧人匠鷹房軍民軍站營田稻田烟粉千戶總管提舉等官以署計者四十餘以員計者七百餘此可得而稽攷者也其五戶絲金鈔之數則丙申歲所賜濟寧路之三萬戶至元十八年所賜汀州路之四萬戶絲以斤計者歲二千二百有奇鈔以錠計者歲一千六百有奇此則所謂歲賜者也

### 李禿

李禿亦乞列思氏善騎射太祖嘗潛遣朮兒徹丹出使至也兒古納河李禿知其爲帝所遣值日暮因留住宿殺羊以享之朮兒徹丹馬疲乏復假以良馬及還李禿待之有加朮兒徹丹具以白帝帝大喜許妻以皇妹帖木倫李禿宗族乃遣也不堅牙等詣太祖因致言曰臣聞威德所加若雲開見日春風解凍喜不自勝帝問李禿禿孳畜幾何也不堅反對曰有馬三十匹請以馬之半

為聘禮帝怒曰婚姻而論財殆若商賈矣昔人有言同心實難朕方欲取天下汝亦乞列思之民從孛秃効忠於我可也何以財為竟以皇妹妻之既而札赤刺反札木哈脫也等以兵三萬入寇孛秃聞之遣波欒反磨里秃來告乃與哈刺里札刺兀塔兒哈泥等討脫也等掠其輜重降其民乃蠻叛帝召孛秃以兵至大戰敗之皇妹薨復妻以皇女火臣別吉而命哈兒八台之子也可忽林圖帶弓矢為之侍哈兒八台曰吾兒豈能為人臣僕寧死不為也帝令孛秃與之敵哈兒八台令月列等拒戰於碗圖河孛秃直前擒月列刺殺也可忽林圖

哈兒八台走渡拙赤河又擒之盡殺其眾從太師國王木華黎略地遼東西以功封冠懿二州從征西夏病薨贈推忠宣力佐命功臣太師開府儀同三司駙馬都尉上柱國進封昌王諡忠武子鎖兒哈襲爵

鎖兒哈事太宗與木華黎取嘉州降其民遣伯秃兒哈拙赤碣來獻捷帝曰若父宣力國家朕昔見之今鎖兒哈克光前烈賜以金錦金帶七寶鞍召至中都以疾薨鎖兒哈娶皇子幹赤女安秃公主生女是為憲宗皇后子札忽兒臣從定宗出討萬奴有功太宗命親王安赤台以女也孫真公主妻之薨贈推誠靖宣佐運贊治功

臣太師開府儀同三司駙馬都尉上柱國襲封昌王諡忠靖札忽兒臣有子二人長月列台娶皇子賽因主卜女哈荅罕公主生脫別台與乃顏戰有功次忽憐

忽憐尙憲宗女伯牙魯罕公主後脫黑帖木兒叛世祖命忽憐與失列及等討之大戰終日脫黑帖木兒敗走帝嘉之復令尙憲宗孫女不蘭奚公主宋平封以廣州乃顏聲刺哈兒叛世祖親征薛徹堅等與哈刺罕屢戰帝召忽憐至值薛徹堅等戰于程火失温之地哈荅罕衆甚盛忽憐以兵二百迎敵敗之哈荅罕等走度猱河還其巢穴踰年夏帝命忽憐復征之至曲列兒塔兀兒

二河之間大戰其衆皆度塔兀河遁去餘百人逃匿山谷忽憐卽率兵二百徒步追之薛徹堅止之曰彼亡命者安得徒行忽憐不聽往殺其衆薛徹堅以聞賜金一錠銀五錠又踰年復往征之與哈荅罕遇于兀刺河忽憐夜率千人潛入其軍盡殺之帝賜鈔五萬貫金一錠銀十錠忽憐薨贈効忠保德輔運佐理功臣太師開府儀同三司駙馬都尉上柱國追封昌王諡忠宣子阿失事成宗篤哇叛于海都帝遣晉王甘麻刺并武宗帥師討之大德五年戰哈刺荅山阿失射篤哇中其膝擒殺甚多篤哇號哭而遁武宗賜之衣成宗加賜珠衣封爲

昌王置王府官屬仁宗朝復賜以寧昌縣稅入阿失尙  
成宗女亦里哈牙公主復尙憲宗曾孫女買的公主阿  
失薨子八刺失里襲封昌王忽憐從弟不花尙世祖女  
兀魯眞公主其弟鎖郎哈娶皇子忙哥刺女奴兀倫公  
主生女是爲武宗仁獻章聖皇后實生明宗

阿刺兀思剔吉忽里

阿刺兀思剔吉忽里汪古部人系出沙陀鴈門之後遠  
祖十國世爲部長金源氏塹山爲界以限南北阿刺兀  
思剔吉忽里以一軍守其衝要時西北有國曰乃蠻其  
主太陽可汗遣使來約欲相親附以同據朔方部衆有

欲從之者阿刺兀思剔吉忽里弗從乃執其使奉酒六  
尊具以其謀來告太祖時朔方未有酒太祖飲三爵而  
止曰是物少則發性多則亂性使還酬以馬五百羊一  
千遂約同攻太陽可汗阿刺兀思剔吉忽里先期而至  
旣平乃蠻從下中原復爲嚮導南出界垣太祖留阿刺  
兀思剔吉忽里歸鎮本部爲其部衆昔之異議者所殺  
長子不顏昔班併死之其妻阿里黑携幼子孛要合與  
姪鎮國逃難夜遁至界垣告守者縋城以登因避地雲  
中太祖旣定雲中購求得之賜與甚厚乃追封阿刺兀  
思剔吉忽里爲高唐王阿里黑爲高唐王妃以其子孛

要合尙幼先封其姪鎮國爲北平王鎮國薨子聶古台襲爵尙睿宗女獨木干公主略地江淮薨于軍賜興州民千餘戶給其葬孛要合幼從攻西域還封北平王尙阿刺海別吉公主公主明睿有智略車駕征伐四出嘗使留守軍國大政諮稟而後行師出無內顧之憂公主之力居多孛要合未有子公主爲進姬妾以廣嗣續生三子曰君不花曰愛不花曰拙里不花公主視之皆如己出孛要合薨追封高唐王諡武毅後加贈宣忠協力翊衛果毅功臣太傅儀同三司上柱國駙馬都尉追封趙王公主阿刺海別吉追封皇祖姑齊國大長公主加

封趙國子君不花尙定宗長女葉里迷失公主愛不花尙世祖季女月烈公主中統初總兵討阿里不哥敗闊不花於按檀火爾歡之地三年圍李壇于濟南獨當一面事平又從征西北敗叛王之黨撒里蠻子孔古烈愛不花卒子闊里吉思

闊里吉思性勇毅習武事尤篤於儒術築萬卷堂於私第日與諸儒討論經史性理陰陽術數靡不該貫尙忽答的迷失公主繼尙愛牙失里公主宗王也不干叛率精騎千餘晝夜兼行旬日追及之時方暑將戰北風大起左右請待之闊里吉思曰當暑得風天贊我也策馬

元史卷一百一十六 列傳  
十一  
赴戰騎士隨之大殺其衆也不干以數騎遁去闕里吉  
思身中三矢斷其髮凱還詔賜黃金三斤白金千五百  
斤成宗卽位封高唐王西北不安請於帝願往平之再  
三請帝乃許及行且誓曰若不平定西北吾馬首不南  
大德元年夏遇敵于伯牙思之地衆謂當俟大軍畢至  
與戰未晚闕里吉思曰大丈夫報國而待人耶卽整衆  
鼓譟以進大敗之擒其將卒百數以獻詔賜世祖所服  
貂裘寶鞍及繒錦七百介冑戈戟弓矢等物二年秋諸  
王將帥共議防邊咸曰敵往歲不冬出且可休兵于境  
闕里吉思曰不然今秋候騎來者甚少所謂鷲鳥將擊

必匿其形備不可緩也衆不以爲然闕里吉思獨嚴兵  
以待之是冬敵兵果大至三戰三克闕里吉思乘勝逐  
北深入險地後騎不繼馬躓陷敵遂爲所執敵誘使降  
惟正言不屈又欲以女妻之闕里吉思毅然曰我帝婿  
也非帝后面命而再娶可乎敵不敢逼帝嘗遣其家臣  
阿昔思特使敵境見於人衆中闕里吉思一見輒問兩  
宮安否次問嗣子何如言未畢左右卽引其去明日遣  
使者還不復再見竟不屈死焉九年追封高唐忠憲王  
加贈推忠宣力崇文守正亮節保德功臣太師開府儀  
同三司上柱國駙馬都尉追封趙王公主忽答的迷失


追封齊國長公主愛牙失里封齊國公主並加封趙國子术安幼詔以弟木忽難襲高唐王木忽難才識英偉謹守成業撫民御衆境內乂安痛其兄死節遣使如京師表請卹典又請翰林承旨閻復銘諸石教養术安過於已子命家臣之謹厚者掌其兄之珍服秘玩待术安成立悉以付之至大二年木忽難加封趙王卽以讓术安三年术安襲趙王尙晉王女阿刺的納八刺公主一日召王傅脫歡司馬阿昔思謂曰先王旅殯卜羅荒遠之地神靈將何依吾痛心欲無生若請於上得歸葬先塋瞑目無憾矣二人言之知樞密院事也里吉尼以聞

帝嗟悼久之曰术安孝子也卽賜阿昔思黃金一瓶得脫歡之子失忽都魯王傅木忽難之子阿魯忽都斷事官也先等一十九人乘驛以往復賜從者鈔五百貫淇陽王月赤察兒丞相脫禾出八都魯差兵五百人護其行至殯所奠告啓視尸體如生遂得歸葬

元史卷一百十八

十一

元史卷一百十八



元史卷一百十九

明翰林學士亞中大夫知制誥兼修國史宋 濂等修

列傳第六

木華黎

木華黎札刺兒氏世居阿難水東父孔温窟哇以戚里故在太祖麾下從平篋里吉征乃蠻部數立功後乃蠻又叛太祖與六騎走中道乏食擒水際橐駝殺之燔以啖太祖追騎垂及而太祖馬斃五騎相顧駭愕孔温窟哇以所乘馬濟太祖身當追騎死之太祖獲免有子五人木華黎其第三子也生時有白氣出帳中神巫異之

乾隆四年校刊

元史卷一百十九 列傳

曰此非常兒也及長沉毅多智畧猿臂善射挽弓二石  
強與博爾朮博爾忽赤老温事太祖俱以忠勇稱號掇  
里班曲律猶華言四傑也太祖軍嘗失利會大雪失牙  
帳所在夜臥草澤中木華黎與博爾朮張裘氊立雪中  
障蔽太祖達旦竟不移足一日太祖從三十餘騎行谿  
谷間顧謂曰此中或遇寇當柰何對曰請以身當之旣  
而寇果自林間突出矢下如雨木華黎引弓射之三發  
中三人其酋呼曰爾爲誰曰木華黎也徐解馬鞍持之  
捍衛太祖以出寇遂引去克烈王可汗與乃蠻部讐戰  
求援於太祖太祖遣木華黎及博爾朮等救之盡殺乃

蠻之衆于按臺之下獲甲仗馬牛而還旣而王可汗謀  
襲太祖其下拔台知之密告太祖太祖遣木華黎選精  
騎夜斫其營王可汗走死諸部大人聞風欵附歲丙寅  
太祖卽皇帝位首命木華黎博爾朮爲左右萬戶從容  
謂曰國內平定汝等之力居多我與汝猶車之有轅身  
之有臂也汝等切宜體此勿替初心金之降者皆言其  
主璟殺戮宗親荒淫日恣帝曰朕出師有名矣辛未從  
伐金薄宣德遂克德興壬申攻雲中九原諸郡拔之進  
圍撫州金兵號四十萬陣野狐嶺北木華黎曰彼衆我  
寡弗致死力戰未易破也率敢死士策馬橫戈大呼陷

陣帝麾諸軍並進大敗金兵追至澮河殲尸百里癸酉  
攻居庸關壁堅不得入遣別將闞別統兵趨紫荆口金  
左監軍高琪引兵來拒不戰而潰遂拔涿州因分兵攻  
下益都濱棣諸城遂次霸州史天倪蕭勃迭率衆來降  
並奏爲萬戶甲戌從圍燕金主請和北還命統諸軍征  
遼東次高州盧琮金朴以城降乙亥裨將蕭也先以計  
平定東京進攻北京金守將銀青率衆二十萬拒花道  
逆戰敗之斬首八萬餘級城中食盡契丹軍斬關來降  
進軍逼之其下殺銀青推寅荅虎爲帥遂舉城降木華  
黎怒其降緩欲坑之蕭也先曰北京爲遼西重鎮旣降

而坑之後豈有降者乎從之奏寅荅虎留守北京以吾  
也而權兵馬都元帥鎮之遣高德玉劉蒲速窩兒招諭  
興中府同知兀里卜不從殺蒲速窩兒德玉走免未幾  
吏民殺兀里卜推土豪石天應爲帥舉城降奏爲興中  
尹兵馬都提控錦州張鯨聚衆十餘萬殺節度使稱臨  
海郡王至是來降詔木華黎以鯨總北京士提控兵從  
掇忽闌南征未附州郡木華黎密察鯨有反側意請以  
蕭也先監其軍至平州鯨稱疾逗留復謀遁去監軍蕭  
也先執送行在誅之鯨弟致憤其兄被誅據錦州叛畧  
平欒瑞利義懿廣寧等州木華黎率蒙古不花等軍數

萬討之州郡多殺致所署長吏降進逼紅羅山主將杜秀降奏爲錦州節度使丙子致陷興中府七月進兵臨興中先遣吾也而等攻溜石山諭之曰今若急攻賊必遣兵來援我斷其歸路致可擒也又遣蒙古不花屯承德縣東候之致果遣鯨子東平將騎兵八千步卒三萬援溜石蒙古不花引兵趨之馳報木華黎夜半引兵疾馳遇于神水縣東夾擊之分麾下兵之半下馬步戰選善射者數千令曰賊步兵無甲疾射之乃麾騎兵齊進大敗之斬東平及士卒萬二千八百餘級拔開義縣進圍錦州致遣張太平高益出戰又敗之斬首三千餘級

溺死者不可勝數圍守月餘致憤將校不戮力殺敗將二十餘人高益懼縛致出降伏誅廣寧劉琰懿州田和尚降木華黎曰此叛寇存之無以懲後除工匠優伶外悉屠之拔蘇復海三州斬完顏衆家奴咸平宣撫蒲鮮等率衆十餘萬遁入海島丁丑八月詔封太師國王都行省承制行事賜誓券黃金印曰子孫傳國世世不絕分弘吉刺亦乞烈思兀魯兀忙兀等十軍及吾也而契丹蕃漢等軍並屬麾下且諭曰太行之北朕自經畧太行以南卿其勉之賜大駕所建九旂大旗仍諭諸將曰木華黎建此旗以出號令如朕親臨也乃建行省于雲

燕以圖中原遂自燕南攻遂城及蠡州諸城拔之冬破大名府遂東定益都淄登萊濰密等州戊寅自西京由大和嶺入河東攻太原忻代澤潞汾霍等州悉降之遂徇平陽金守臣棄城遁以前鋒拓拔按察兒統蒙古軍鎮之拒金兵以義州監軍李廷植之弟守忠權河東南路帥府事已卯以蕭特末兒等出雲朔攻降尙嵐火山軍以谷里夾打爲元帥達魯花赤攻拔石隰州擊絳州克之庚辰復由燕徇趙至滿城武仙舉真定來降權知河北西路兵馬事史天倪進言曰今中原粗定而所過猶縱兵抄掠非王者弔民之意也木華黎曰善下令禁

無剽掠所獲老稚悉遣還田里軍中肅然吏民大悅兵至滏陽金邢州節度使武貴迎降進攻天平寨破之遣蒙古不花分兵畧定河北衛懷孟州入濟南嚴實籍所隸相魏磁洛恩博滑濬等州戶三十萬詣軍門降時金兵屯黃陵岡號二十萬遣步兵二萬襲濟南木華黎以輕兵五百擊走之遂會大軍薄黃陵岡金兵陣河南岸示以死戰木華黎曰此不可用長兵當以短兵取勝令騎下馬引滿齊發亦下馬督戰果大敗之溺死者衆進攻楚丘楚丘城小而固四面皆水令諸軍以草木填塹直抵城下嚴實率所部先登拔之攻下單州圍東平以

實權山東西路行省戒之曰東平糧盡必棄城走汝伺其去卽入城安輯之勿苦郡縣以敗事也留梭魯忽禿以蒙古軍三千屯守之辛巳四月東平糧盡金行省忙古奔汴梭魯忽禿邀擊之斬七千餘級忙古引數百騎遁去實入城建行省撫其民先是郡王帶孫攻洛不下至是遣石天應援之五月還軍野狐嶺宋漣水忠義統轄石珪來降以爲濟兗單三州都總管予綉衣玉帶勞之曰汝不憚跋涉數千里慕義而來尋當列奏賜汝高爵爾其勉之京東安撫使張琳皆來降以琳行山東東路益都滄景濱棣等州都元帥府事鄭遵亦以棗鄉椿

縣降陞爲完州以遵爲節度使行元帥府事秋八月從駐青冢監國公主遣使來勞大饗將士田東勝渡河西夏國李王請以兵五萬屬焉冬十月復由雲中歷太和寨入葭州金將王公佐遁以石天應權行臺兵馬都元帥進取綏德破馬蹄寨距延安三十里止舍金行省完顏合達出兵三萬陣于城東蒙古不花以騎三千覘之馳報曰彼見吾兵少有輕敵心明日合戰當佯敗可以伏兵取勝也從之夜半以大軍銜枚齊進伏於城東十五里兩谷間明日蒙古不花進兵望見金兵卽棄鼓旗走金兵果追之伏發鼓聲震天地萬矢齊下金兵大敗

斬七千級獲馬八百合達走保延安圍之旬日不下乃南徇洛川克鄜州北京權帥石天應擒送金驍將張鐵槍木華黎責其不降厲聲答曰我受金朝厚恩二十餘年今事至此有死而已木華黎義之欲解其縛諸將怒其不屈竟殺之遂降坊州大饗士卒聞金復取隰州以軒成爲經畧使於是復由丹州渡河圍隰克之留合丑統蒙古軍鎮石隰間以田雄權元帥府事壬午秋七月令蒙古不花引兵出秦隴以張聲勢視山川險夷大兵道雲中攻下孟州四蹄寨遷其民于州拔晉陽義和寨進克三清巖入霍邑山堡遷其人於趙城縣薄青龍堡

金平陽公胡天祚拒守裨將蒲察定住監軍王和開壁降遷天祚于平陽八月有星晝見隱士喬靜真曰今觀天象未可征進木華黎曰主上命我平定中原今河北雖平而河南秦鞏未下若因天象而不進兵天下何時而定耶且違君命得爲忠乎冬十月過晉至絳拔滎州胡瓶堡所至望風歸附河中久爲金有至是復來歸木華黎召石天應謂曰蒲爲河東要害我擇守者非君不可乃以天應權河東南北路陝右關西行臺平陽李守忠太原攸哈剌拔都隰州田雄並受節制命天應造浮梁以濟歸師乃渡河拔同州下蒲城徑趨長安金京兆

行省完顏合達擁兵二十萬固守不下乃分麾下兀胡  
乃太不花兵六千屯守之遣按赤將兵三千斷潼關遂  
西擊鳳翔月餘不下謂諸將曰吾奉命專征不數年取  
遼西遼東山東河北不勞餘力前攻天平延安今攻鳳  
翔皆不下豈吾命將盡耶乃駐兵渭水南遣蒙古不花  
南越牛嶺關狗宋鳳州而還時中條山賊侯七等聚衆  
十餘萬伺大兵既西謀襲河中石天應遣別將吳權府  
引兵五百夜出東門伏兩谷間戒之曰侯賊過半急擊  
之我出其前爾攻其後可克也吳權府醉酒失期天應  
戰死城陷賊燒燬廬舍殺掠人民還走中條先鋒元帥

按察兒邀擊敗之斬數萬級侯七復遁去木華黎以天  
應子幹可襲領其衆癸未春師還浮梁未成顧諸將曰  
橋未畢工安可坐待乎復攻下河西堡寨十餘三月渡  
河還聞喜縣疾篤召其弟帶孫曰我爲國家助成大業  
擐甲執銳垂四十年東征西討無復遺恨第恨汴京未  
下耳汝其勉之薨年五十四厥後太祖親攻鳳翔謂諸  
將曰使木華黎在朕不親至此矣至治元年詔封孔溫  
窟哇推忠效節保大佐運功臣太師開府儀同三司上  
柱國魯國王諡忠宣木華黎體仁開國輔世佐命功臣  
太師開府儀同三司上柱國魯國王諡忠武子孛魯嗣

李魯沈毅魁傑寬厚愛人通諸國語善騎射年二十七入朝行在所時太祖在西域夏國主李王陰結外援蓄異圖密詔李魯討之甲申秋九月攻銀州克之斬首數萬級獲生口馬駝牛羊數十萬俘監府塔海命都元帥蒙古不花將兵守其要害而還乙酉春復朝行在所同知真定府事武仙叛殺都元帥史天倪脅居民遁于雙門寨仙弟質於軍中挈家逃歸遣撒寒追及於紫金關斬之命天倪弟天澤代領帥府事丙戌夏詔封功臣戶口爲食邑曰十投下李魯居其首宋將李全陷益都執元帥張琳送楚州秋九月郡王帶孫率兵圍全于益都冬十二月李魯引兵入齊先遣李喜孫招諭全全欲降部將田世榮等不從殺喜孫丁亥春三月全突圍欲走邀擊大敗之斬首七千餘級自相蹂踐溺死不可勝計夏四月城中食盡全降諸將皆曰全勢窮出降非心服也今若不誅後必爲患李魯曰不然誅一人易耳山東未降者尙多全素得人心殺之不足以立威徒失民望表聞詔李魯便宜處之乃以全爲山東淮南楚州行省鄭衍德田世榮副之郡縣聞風欵附山東悉平時滕州尙爲金守諸將或言炎暑未可進攻李魯曰主上親督大軍平定西域數年未聞當暑不戰我等安敢自逸乎

遂促進兵金兵出戰敗之斬三千餘級其餘老幼開門  
出降以州屬石天祿俾先鋒元帥蕭乃台統蒙古軍屯  
濟兗課課不花以兵三千屯濰沂莒以備宋千戶按禮  
統大軍駐河北備金九月師還至燕獵于昌平民持牛  
酒以獻卻之及還賜館人銀數百兩聞太祖崩趨赴北  
庭哀毀邁疾戊子夏五月薨年三十二至治元年詔封  
純誠開濟保德輔運功臣太師開府儀同三司上柱國  
魯國王諡忠定子七人長塔思次速渾察次霸都魯次  
伯亦難次野蔑千次野不干次阿里乞失  
塔思一名查刺温幼與常見異英才大畧綽有祖風木

華黎常曰成吾志必此兒也及長每語必先忠孝曰大  
丈夫受天子厚恩當效死行陣間以圖報稱安能委靡  
苟且目前以隳先世勲業哉年十八襲爵遂至雲中庚  
寅秋九月叛將武仙圍潞州太宗命塔思救之仙聞之  
退軍十餘里大兵未至塔思率十餘騎覘賊形勢仙恐  
有伏不敢犯塔思曰日暮矣待明旦擊之是夜五鼓金  
將移刺蒲瓦來襲我師與戰不利退守沁南賊還攻潞  
州城陷主將任存死之冬十月帝親征遣萬戶因只吉  
台與塔思復取潞州仙夜遁邀擊之斬首七千餘級以  
任存姪代領其衆十一月帝攻鳳翔命塔思守潼關以

備金兵河中自石天應死復爲金有辛卯帝親攻拔之  
金元帥完顏火燎遁塔思追斬之壬辰春睿宗與金兵  
相拒于汝漢間金步騎二十萬帝命塔思與親王按赤  
台口溫不花合軍先進渡河以爲聲援至三峯山與睿  
宗兵合金兵成列將戰會大雪分兵四出塔思冒矢石  
先挫其鋒諸軍繼進大敗金兵擒移刺蒲瓦完顏合達  
單騎走鈞州追斬之遂拔鈞州三月帝北還詔塔思與  
忽都虎統兵畧定河南諸郡皆降惟汴京歸德蔡州未  
下塔思遣使請曰臣之祖父佐興大業累着勲伐臣襲  
世爵曾無寸效去歲復失利上黨罪當萬死願分攻汴

城一隅以報陛下帝壯其言命卜之不利乃止癸巳秋  
九月從定宗于潛邸東征擒金咸平宣撫完顏萬奴于  
遼東萬奴自乙亥歲率衆保東海至是平之甲午秋七  
月朝行在所時諸王大會帝顧塔思曰先皇帝肇開大  
業垂四十年今中原西夏高麗回鶻諸國皆已臣附惟  
東南一隅尚阻聲教朕欲躬行天討卿等以爲何如羣  
臣未對塔思對曰臣家累世受恩圖報萬一正在今日  
臣雖駑鈍願仗天威掃清淮浙何勞大駕親臨不測之  
地哉帝悅曰塔思雖年少英風美績簡在朕心終能成  
我家大事矣賜黃金甲玻璃帶及良弓二十命與王子

曲出總軍南征乙未冬拔棗陽曲出別徇襄鄧塔思引  
兵攻郢鄧瀕漢江城堅兵精且多戰艦塔思命造木筏  
遣汶上達魯花赤劉拔都兒將死士五百乘筏進擊引  
騎兵沿岸迎射大破之溺死者過半餘皆走郢壁堅不  
能下俘生口馬牛數萬而還丙申冬十月復出鄧州遂  
至蘄黃蘄州遣使獻金帛牛馬犒師請曰宋小國也進  
貢大朝有年矣惟王以生靈爲念乃捨之遂進拔符鎮  
六安縣焦家寨丁酉秋九月申八柳渡河入汴京守臣  
劉甫置酒人慶殿塔思曰此故金主所居我人臣也不  
可處此遂宴於甫家冬十月復與口温不花攻光州主  
將黃舜卿降口温不花別畧黃州塔思攻大蘇山斬首  
數千級獲生口牛馬以千數戊戌春正月至安慶府官  
民皆遁于江東至北峽關宋汪統制率兵三千降遷之  
尉氏三月朝行在所秋九月帝宴羣臣于行宮塔思大  
醉帝語侍臣曰塔思神已逝矣其能久乎冬十二月還  
雲中己亥春三月薨年二十八子碩篤兒幼弟速渾察  
襲碩篤兒既長詔別賜民三千戶爲食邑得建國王旗  
幟降五品印一七品印二付其家臣置官屬如列侯故  
事碩篤兒薨子忽都華襲忽都華薨子忽都帖木兒襲  
忽都帖木兒薨子寶哥襲寶哥薨子道童襲

速渾察性嚴厲賞罰明信人莫敢犯與兄塔思從太宗  
攻鳳翔有功將兵抵潼關與金人戰屢捷旣滅金皇子  
闊出攻宋棗陽入郢速渾察皆與焉歲己亥塔思薨速  
渾察襲爵卽上京之西阿兒查禿置營總中都行省蒙  
古漢軍凡他行省監鎮事必先白之定其可否而後上  
聞帝嘗遣使至見其威容凜然侷儻有奇氣所部軍士  
紀綱整肅還朝以告帝曰真木華黎家兒也他國使有  
至者每見皆倉皇失次不能措辭必慰撫良久始得盡  
其所欲言左右或諫曰諸王百司旣莫敢越而復示之  
以威使人怖畏盍少加寬恕以待之速渾察曰爾言誠

是也然時有不同寬猛各有所宜施天下初附民心未  
安萬一守者自縱事變忽起悔之晚矣尋薨延祐三年  
贈宣忠同德翊運功臣太師開府儀同三司上柱國追  
封爲東平郡王諡忠宣子四人曰忽林池襲王爵曰乃  
燕曰相威曰撒蠻相威自有傳

乃燕性謙和好學以賢能稱速渾察旣薨憲宗擇於諸  
子命乃燕襲爵乃燕力辭曰臣有兄忽林池當襲帝曰  
朕知之然柔弱不能勝忽林池亦固讓乃燕頓首涕泣  
力辭不得命旣而曰若然則王爵必不敢受願代臣兄  
行軍國之事於是忽林池襲爲國王事無巨細必與乃

燕謀議剖決精當無所擁滯世祖在潛藩常與論事乃  
燕敷陳大義又明習典故世祖謂左右曰乃燕後必可  
大用因號之曰薛禪猶華言大賢也乃燕雖居顯要而  
小心謹畏每誨羣從子弟曰先世從太祖皇帝出入矢  
石間被堅執銳斬將搴旗勤勞四十餘年遂成功名以  
故一家蒙恩深厚可謂極矣慎勿驕惰以墮先王之名  
爾曹戒之病卒世祖聞之爲之悲悼至正八年贈中奉  
大夫遼陽等處行中書省叅知政事護軍追封魯郡公  
子二人曰碩德曰伯顏察兒碩德通敏有幹才世祖卽  
位入宿衛典朝儀後同知通政院事嘗言遼東幹拙吉  
烈滅二種民數爲寇宜遣近臣諭之帝方難其人僉曰  
惟碩德元勲世胄可使帝深然之以問碩德對曰先臣  
從太祖皇帝定天下不辭險艱以立勲業陛下不以臣  
年少愚戇願請行帝大喜賜御衣錫燕以行碩德至集  
諸萬戶陳兵衝要詰其渠魁誅之脅從者皆降帝大悅  
賞賚有差後從征乃顏及使西域屢建殊勲卒贈推忠  
宣惠寧遠功臣諡忠敏加贈資善大夫嶺北等處行中  
書省右丞上護軍追封魯郡公

霸突魯從世祖征伐爲先鋒元帥累立戰功世祖在潛  
邸從容語霸突魯曰今天下稍定我欲勸主上駐驛回

鶻以休兵息民何如對曰幽燕之地龍蟠虎踞形勢雄偉南控江淮北連朔漠且天子必居中以受四方朝覲大王果欲經營天下駐驛之所非燕不可世祖憮然曰非卿言我幾失之己未秋命霸突魯率諸軍由蔡伐宋且移檄諭宋沿邊諸將遂與世祖兵合而南五戰皆捷遂渡大江傅于鄂會憲宗崩于蜀阿里不哥搆亂和林世祖北還留霸突魯總軍務以待命世祖至開平卽位還定都于燕嘗曰朕居此以臨天下霸突魯之力也師還中統二年卒于軍大德八年追贈推誠宣力翊衛功臣太師開府儀同三司上柱國東平王諡武靖夫人帖木倫昭睿順聖皇后同母兄也子四人長安童次定童次霸都虎台他姬子曰和童襲國王安童別有傳

塔塔兒台孔溫窟哇第三子帶孫郡王之後父曰忙哥從憲宗征伐累立戰功歲己未攻合州會憲宗崩命塔塔兒台護靈駕赴北會阿里不哥叛拘留數日逃歸追騎執以北還將殺之親王阿速台玉龍塔思曰塔塔兒台乃太師國王之裔不可殺也遂獲免至元元年從阿速台來歸世祖嘉之授懷遠大將軍佩金虎符世襲東平達魯花赤命宿衛士四十人給驛送之官所莅官一紀鎮靜不擾鄆人賴之以安卒年四十二子四人只必

幼嗜讀書習翰墨至元十四年監東平官少中大夫多善政以清白稱嘗出家藏書二千餘卷置東平廟學使學徒講肄之尋授嘉議大夫江南湖北道提刑按察使改浙西大德四年入覲賜金段十疋明年春卒年五十子三人皆早喪自只必除按察使弟禿不申嗣其職禿不申性淳靖喜怒不形知民疾苦而能以善道之旱嘗致禱卽雨歲饑請於朝發廩以賑之睦同僚興學校加太中大夫士民刻石紀其政績云卒年五十一子五人長不老赤次塔實脫因次阿魯灰次完者不花次留住馬皆以次嗣爲東平達魯花赤

脫脫祖嗣國王速渾察沈深有智畧嘗奉命征討所向克捷父撒蠻幼穎異自襁褓時世祖撫育之若子嘗挾之南征同舟濟大江慮其有失繫之御榻及長常侍左右帝嘗詔之曰男女異路古制也況掖庭乎禮不可不肅汝其司之旣而近臣孛羅衛命遽出行失其次撒蠻怒其違禮執而囚之別室帝恠其久不至詢知其故命釋其罪撒蠻因進曰令自陛下出陛下乃自違之何以責臣下乎帝曰卿言誠是也由是有意大任之會以疾卒不果年僅一十有七脫脫幼旣失怙其母孛羅海篤意教之孜孜若恐不及稍長直宿衛世祖復親誨導尤

以嗜酒爲戒旣冠儀觀甚偉喜與儒士語每聞一善言  
善行若獲拱璧終身識之不忘至元二十四年從征乃  
顏帝駐驛於山巔旌旗蔽野鼓未作候者報有隙可乘  
脫脫卽擐甲率家奴數十人疾馳擊之衆皆披靡不敢  
前帝望見之大加嗟賞遣使者勞之且召還曰卿勿輕  
進此寇易擒也視其力已折馬已中箭矣帝顧謂近臣  
曰撒蠻不幸早死脫脫幼朕撫而教之常恐其不立今  
能如此撒蠻可謂有子矣遂親解佩刀及所乘馬賜之  
由是深加器重得預聞機密之事其後哈丹復爲亂成  
宗時在潛邸督師往征之脫脫引衆率先躍馬蹙之其

衆大潰脫脫馬陷于淖泥中哈丹兵復進挑戰脫脫弟  
阿老瓦丁奮戈衝擊遂大敗之成宗卽位其寵顧爲尤  
篤常侍禁闔出入惟謹退語家人曰我昔親承先帝訓  
飭令毋嗜飲今未能絕也豈有爲人知過而不能改者  
乎自今以往家人有以酒至吾前者卽痛懲之帝聞之  
喜曰扎刺兒台如脫脫者無幾今能剛制于酒真可大  
用矣卽拜資德大夫上都留守通政院使虎賁衛親軍  
都指揮使政令嚴肅克修其職三年朝議以江浙行省  
地大人衆非世臣有重望者不足以鎮之進拜榮祿大  
夫江浙等處行中書省平章政事有旨命中書祖道都

門外以餞之始至嚴飭左右毋預公家事且戒其掾屬曰僕從有私囑者慎勿聽若軍民諸事有關於利害者則言之當言而不言爾之責也言而不聽我之咎也聞者爲之悚慄時朱清張瑄以海運之故致位參知政事恃其勢位多行不法恐事覺以黃金五十兩珠三囊賂脫脫求蔽其罪脫脫大怒繫之有司遣使者以聞帝喜曰脫脫我家老臣之子孫其志固宜與衆人殊賜內府黃金五十兩命回使寵賚之有豪民白晝殺人者脫脫立命有司按法誅之自是豪猾屏息民賴以安帝以浙民相安之久未及召還大德十一年卒于位年四十四

子孕兒只別有傳

博爾朮

博爾朮阿兒剌氏始祖孛端察兒以才武雄朔方父納忽阿兒闡與烈祖神元皇帝接境敦睦隣好博爾朮志意沉雄善戰知兵事太祖於潛邸共履艱危義均同氣征伐四出無往不從時諸部未寧博爾朮每警夜帝寢必安枕寓直於內語及政要或至達旦君臣之契猶魚水也初要兒斤部卒盜牧馬博爾朮與往追之時年十三知衆寡不敵乃出奇從旁夾擊之盜舍所掠去及戰于大赤兀里兩軍相接下令殊死戰跬步勿退博爾朮

繫馬於腰蹠而引滿分寸不離故處太祖嘉其勇膽又嘗潰圍於怯列太祖失馬博爾朮擁帝累騎而馳頓止中野會天雨雪失牙帳所在臥草澤中與木華黎張璁裘以蔽帝通夕植立足蹟不移及旦雪深數尺遂免於難篋里期之戰亦以風雪迷陣再入敵中求太祖不見急趨輜重則帝已還臥憇車中聞博爾朮至曰此天贊我也丙寅歲太祖卽皇帝位君臣之分益密嘗從容謂博爾朮及木華黎曰今國內平定多汝等之力我之與汝猶車之有轅身之有臂汝等宜體此勿替遂以博爾朮及木華黎爲左右萬戶各以其屬翊衛位在諸將上

皇子察哈反出鎮西域有旨從博爾朮受教博爾朮教以人生經涉險阻必獲善地所過無輕舍止太祖謂皇子曰朕之教汝亦不踰是未幾賜廣平路戶一萬七千三百有奇爲分地以老病薨太祖痛悼之大德五年贈推忠協謀佐運功臣太師開府儀同三司追封廣平王諡武忠子孛藥台襲爵萬戶贈推誠宣力保順功臣太師開府儀同三司追封廣平王諡忠定孫玉昔帖木兒玉昔帖木兒世祖時嘗寵以不名賜號月呂魯那演猶華言能官也弱冠襲爵統按台部衆器量宏達莫測其際世祖聞其賢驛召赴闕見其風骨龐厚解御服銀貂

賜之時重太官內膳之選特命領其事侍宴內殿玉昔帖木兒起行酒詔諸王妃皆爲答禮至元十二年拜御史大夫時江南既定益封功臣後遂賜全州清湘縣戶爲分地其中臺務振宏綱弗親細故與利之臣欲援金舊制併憲司入漕府當政者又請以郡府之吏互照憲司檢底玉昔帖木兒曰風憲所以戢奸若是有傷監臨之體其議乃沮遇事廷辯吐辭鯁直世祖每爲之霽威至元二十四年宗王乃顏叛東鄙世祖躬行天討命總戎者先之世祖至半道玉昔帖木兒已退敵僵尸覆野數旬之間三戰三捷獲乃顏以獻詔選乘輿橐駝百

蹄勞之謝曰天威所臨猶風偃草臣何力之有世祖還留玉昔帖木兒勦其餘黨乃執其酋金家奴以獻戮其同惡數人於軍前明年乃顏之遺孽哈丹禿魯干復叛再命出師兩與之遇皆敗之追及兩河其衆大斃遂遁時已盛冬聲言俟春方進乃倍道兼行過黑龍江擣其巢穴殺戮殆盡哈丹禿魯干莫知所終夷其城撫其民而還詔賜內府七寶冠帶以旌之加太傅開府儀同三司申命禦邊杭海二十九年加錄軍國重事知樞密院事宗王帥臣咸稟命焉特賜步輦入內位望之崇廷臣無出其右三十年成宗以皇孫撫軍北邊玉昔帖木兒

輔行請授皇孫以儲闡舊璽詔從之三十一年世祖崩  
皇孫南還宗室諸王會于上都定策之際玉昔帖木兒  
起謂晉王甘麻刺曰宮車晏駕已踰三月神器不可久  
虛宗祧不可乏主疇昔儲闡符璽既有所歸王爲宗盟  
之長奚俟而不言甘麻刺遽曰皇帝踐祚願北面事之  
於是宗親大臣合辭勸進玉昔帖木兒復坐曰大事已  
定吾死且無憾皇孫遂卽位進秩太師賜以尙方玉帶  
寶服還鎮北邊元貞元年冬議邊事入朝兩宮賜宴如  
家人禮賜其妻秃忽魯宴服及他珍寶十一月以疾薨  
大德五年詔贈宣忠同德弼亮功臣依前太師開府儀  
同三司錄軍國重事御史大夫追封廣平王諡曰貞憲  
子三人木剌忽仍襲爵爲萬戶次脫憐次脫脫哈爲御  
史大夫

博爾忽

博爾忽許兀慎氏事太祖爲第一千戶歿於敵子脫歡  
襲職從憲宗四征不庭有拓地功子失里門鎮徼外從  
征六詔等城亦歿于兵子月赤察兒性仁厚勤儉事母  
以孝聞資貌英偉望之如神世祖雅聞其賢且閔其父  
之死年十六召見帝見其容止端重奏對詳明喜而謂  
曰失烈門有子矣卽命領四怯薛太官至元十七年長

一怯薛明年詔日月赤察兒秉心忠實執事敬慎知無不言言無不盡曉暢朝章言輒稱旨不可以其年少而弗陞其官可代線真爲宣徽使二十六年帝討叛者于杭海衆皆陣月赤察兒奏曰丞相安童伯顏御史大夫月呂祿皆已受命征戰三人者臣不可以後之今勅賊逆命敢禦天戈惟陛下憐臣使臣一戰帝曰乃祖博爾忽佐我太祖無征不在無戰不克其功大矣卿以爲安童輩與爾家同功一體各立戰功自恥不逮然親屬橐鞬恭衛朝夕爾功非小何必身踐行伍手事斬馘乃快爾心耶二十七年桑哥旣立尙書省殺異已者箝天下

口以刑爵爲貨旣而紀綱大紊尙書平章政事也速答兒太官屬也潛以其事白月赤察兒請奏劾之桑哥伏誅帝日月赤察兒口伐大姦發其蒙蔽乃以没入桑哥黃金四百兩白金三千五百兩及水田水磴別墅賞其清彊桑哥旣敗帝以湖廣行省西連番洞諸蠻南接交趾島夷延袤數千里其間土沃人稠畬丁溪子善驚好鬪思得賢方伯往撫安之月赤察兒舉哈刺哈孫答刺罕以爲行省平章政事凡八年威德交孚洽于海外入爲丞相天下稱賢世以月赤察兒爲知人二十八年都水使者請鑿渠西導白浮諸水經都城中東入潞河則

江准之舟旣達廣濟渠可直泊於都城之匯帝亟欲其成又不欲役其細民敕四怯薛人及諸府人專其役度其高深畫地分賦之刻日使畢工月赤察兒率其屬著役者服操畚鍤卽所賦以倡趨者雲集依刻而渠成賜名曰通惠河公私便之帝語近臣曰是渠非月赤察兒身率衆手成不速也成宗卽位制曰月赤察兒盡其誠力深其謀議抒忠於國流惠於人可如開府儀同三司太保錄軍國重事樞密宣徽使大德四年拜太師初金山南北叛王海都篤娃據之不奉正朔垂五十年時入爲寇嘗命親王統左右部宗王諸帥屯列大軍備其衝

突五年朝議北師少怠紀律不嚴命月赤察兒副晉王以督之是年海都篤娃入寇大軍分爲五隊月赤察兒將其一鋒旣交頗不利月赤察兒怒被甲持矛身先陷陣一軍隨之出敵之背五軍合擊大敗之海都篤娃遁去月赤察兒亦罷兵歸鎮厥後篤娃來請臣附時武宗亦在軍月赤察兒遣使請武宗及諸王將帥議曰篤娃請降爲我大利固當待命於上然往返再閱月必失事機事機一失爲國大患人民困於轉輸將士疲於討伐無有已時矣篤娃之妻我弟馬兀合刺之妹也宜遣使報之許其臣附衆議皆以爲允旣遣始以事聞帝日月

赤察兒深識機宜既而馬兀合刺復命由是叛人稍稍來歸十年冬叛王滅里鐵木兒等屯于金山武宗帥師出其不意先踰金山月赤察兒以諸軍繼往壓之以威啖之以利滅里鐵木兒乃降其部人驚潰月赤察兒遣禿滿鐵木兒察忽將萬人深入其部人亦降察八兒者海都長子也海都死嗣領其衆至是掩取其部人凡兩部十餘萬口至大元年月赤察兒遣使奏曰諸王禿苦滅本懷攜貳而察八兒游兵近境叛黨素無悛心倘合謀致死則垂成之功顧爲國患臣以爲昔者篤娃先衆請和雖死宜遣使安撫其子欽徹使不我異又諸部既

已歸明我之牧地不足宜處諸降人於金山之陽吾軍屯田金山之北軍食既饒又成重成就彼有謀吾已擣其腹心矣奏入帝曰是謀甚善卿宜移軍阿答罕三撒海地月赤察兒既移軍察八兒禿苦滅果欲奔欽徹不見納去留無所遂相率來降於是北邊始寧帝詔月赤察兒曰卿之先世佐我祖宗常爲大將攻城戰野功烈甚著卿乃國之元老宣忠底績靖謐中外朕入繼大統卿之謀猷居多今立和林等處行中書省以卿爲右丞相依前太師錄軍國重事特封淇陽王佩黃金印宗藩將領實瞻卿麾進退其益懋乃德悉乃心力毋替所服

四年月赤察兒入朝帝宴于大明殿眷禮優渥尋以疾薨于第詔贈宣忠安遠佐運弼亮功臣諡忠武

塔察兒一名倂蓋居官山伯祖父博爾忽從太祖起朔方直宿衛爲火兒赤火兒赤者佩橐鞬侍左右者也由是子孫世其職博爾忽從太祖平諸國宣力爲多當時與木華黎等俱以功號四傑塔察兒其從孫也驍勇善戰幼直宿衛太祖平燕睿宗監國聞燕京盜賊恣意殘殺直指富庶之家載運其物有司不能禁乃遣塔察兒耶律楚材窮治其黨誅首惡十有六人由是巨盜屏迹太宗伐金塔察兒從師授行省兵馬都元帥分宿衛與

諸王軍士俾統之下河東諸州郡濟河破潼關取陝洛辛卯從圍河中府拔之壬辰從渡白坡時睿宗已自西和州入興元由武關出唐鄧太宗以睿宗與金兵相持久乃遣使約期會兵合進卽詔發諸軍至鈞州連日大雪睿宗與金人戰于三峯山大破之詔塔察兒等進圍汴城金主卽以兄子曹王訛可爲質太宗與睿宗還河北塔察兒復與金兵戰于南薰門癸巳金主遷蔡州塔察兒復帥師圍蔡甲午滅金遂留鎮撫中原分兵屯大河之上以遏宋兵丙申破宋光息諸州事聞于朝以息州軍民一千戶賜之戊戌卒子別里虎鯁嗣爲火兒赤

憲宗卽位歲壬子襲父職總管四萬戶蒙古漢軍攻宋  
兩淮悉定邊地戊午會師圍宋襄陽逼樊城力戰死之  
次日宋都解至元七年賜金虎符襲蒙古軍萬戶八年  
悉兵再攻襄陽圍樊城進戰鄂岳漢陽江陵歸峽諸州  
皆有功十二年加昭毅大將軍受詔爲隆興出征都元  
帥與李恒等長驅而宋人莫當其鋒戰勝攻取望風迎  
降盡平江西十一城又徇嶺南廣東宋亡還師未及論  
功卒

元史卷一百十九

元史卷一百十九考證

木華黎傳克烈王可汗○

臣祖庚

按聖武親征記作汪

可罕卽汪罕也

遣別將閣別○

臣祖庚


按一作遮別

博爾忽傳博爾忽○

臣祖庚

按元明善勲德碑忽作渾

元史卷一百十九考證



元史卷一百十九考證

元史卷一百二十

明翰林學士亞中大夫知制誥兼修國史宋 濂等修

列傳第七

察罕 亦力撒 立智理威

察罕初名益德唐兀烏密氏父曲也怯律爲夏臣其妾方懷察罕不容於嫡母以配掌羊羣者及里木察罕稍長其母以告且曰嫡母已有弟矣察罕武勇過人幼牧羊於野植杖於地脫帽寘杖端跪拜歌舞太祖出獵見而問之察罕對曰獨行則帽在上而尊二人行則年長者尊今獨行故致敬於帽且聞有大官至先習禮儀耳

乾隆四年校刊

元史卷一百二十 列傳

帝異之乃挈以歸語光獻皇后曰今日出獵得佳兒可善視之命給事內廷及長賜姓蒙古妻以宮人弘吉刺氏嘗行困脫靴藉草而寢鴉鳴其旁心惡之擲靴擊之有蛇自靴中墜歸以其事聞帝曰是禽人所惡者在爾則爲喜神宜戒子孫勿殺其類從帝略雲中桑乾金將定薛擁重兵守野狐嶺帝遣察罕覘虛實還言彼馬足輕動不足畏也帝命鼓行而前遂破其軍圍白樓七日拔之以功爲御帳前首千戶從帝征西域孛哈里薛迷思于二城回回國主札刺丁拒守鐵門關兵不得進察罕先驅開道斬其將餘衆悉降又從攻西夏破肅州師

次甘州察罕父曲也怯律居守城中察罕射書招之且求見其弟時弟年十三命登城於高處見之且遣使諭城中使早降其副阿綽等三十六人合謀殺曲也怯律父子并殺使者併力拒守城破帝欲盡坑之察罕言百姓無辜止罪三十六人進攻靈州夏人以十萬衆赴援帝親與戰大敗之還次六盤夏主堅守中興帝遣察罕入城諭以禍福衆方議降會帝崩諸將擒夏主殺之復議屠中興察罕力諫止之馳入安集遺民太宗卽位從略河南北還清水荅蘭荅入之地賜馬三百珠衣金帶鞍勒皇子闊出忽都禿伐宋命察罕爲斥候又從親王

口温不花南伐歲乙未克棗陽及光化軍未幾召口温  
不花赴行在以全軍付察罕丁酉復與口温不花進克  
光州戊戌授馬步軍都元帥率諸翼軍攻拔天長縣及  
滁壽泗等州定宗卽位賜黑貂裘一鎗刀十命拓江淮  
地憲宗卽位召見累賜金五十兩珠衣一金綺二疋以  
都元帥兼領尙書省事賜汴梁歸德河南懷孟曹濮太  
原三千餘戶爲食邑及諸處草地合一萬四千五百餘  
頃戶二萬餘未幾復召賜金四百五十兩金綺弓矢等  
物乙卯卒贈推忠開濟翊運功臣開府儀同三司上柱  
國追封河南王諡武宣子十人長木花里木花里事憲

宗直宿衛從攻釣魚山以功授四斡耳朵怯憐口千戶  
賜金幣及黃金馬鞍勒世祖卽位賜金五十兩珠二串  
至元四年攻宋自江陵略地回至安陽灘宋兵扼其歸  
路木花里奮擊敗之都元帥阿朮墜馬宋軍追及之木  
花里挾之上馬鏖戰退宋兵由是得免特賜銀二百五  
十兩佩金虎符爲蒙古軍萬戶復攻襄樊有功卒于軍  
贈推誠宣力功臣榮祿大夫平章政事柱國追封梁國  
公諡武毅從孫亦力撒合

亦力撒合祖曲也怯祖太祖時得召見屬皇子察哈台  
爲扎魯火赤父阿波古事諸王阿魯忽居西域至元十

年擇貴族子備宿衛召亦力撒合至闕下以爲速古兒赤掌服御事甚見親幸有大政時以訪之稱之曰秀才而不名嘗奉使河西還奏諸王只必帖木兒用官太濫帝嘉之擢河東提刑按察使遂平陽路達魯花赤泰不花召還賜黃金百兩銀五百兩以旌其直進南臺中丞帝出內中寶刀賜之曰以鎮外臺時丞相阿合馬之子忽辛爲江浙行省平章政事恃勢貪穢亦力撒合發其姦得贓鈔八十一萬錠奏而誅之并劾江淮釋教總攝楊輦真加諸不法事諸道竦動二十一年改北京宣慰使諸王乃顏鎮遼東亦力撒合察其有異志必反密請

備之二十三年罷宣慰司立遼陽行省以亦力撒合爲參知政事已而乃顏果反帝自將征之時諸軍皆會亦力撒合掌運糧儲軍供無乏東方平帝嘉其先見且餉運有勞加左丞二十七年命尚諸王算吉女親爲資裝以送之併贈玉帶一改四川行省左丞二十九年再賜玉帶一元貞元年成宗卽位入朝卒弟立智理威

立智理威爲裕宗東宮必闡赤典文書至元十八年蜀初定帝閱其地久受兵百姓傷殘擇近臣撫安之以立智理威爲嘉定路達魯花赤時方以闢田均賦弭盜息訟諸事課守令立智理威奉詔甚謹民安之使者交薦

其能會盜起雲南號數十萬聲言欲寇成都立智理威馳入告急言辭懇切繼以泣涕大臣疑其不然帝曰雲南朕所經理未可忽也乃推食以勞之又語立智理威曰南人生長亂離豈不厭兵畏禍耶御之乖方保之不以其道故爲亂耳其歸以朕意告諸將叛則討之服則捨之母多殺以傷主意則人必定矣立智理威至蜀宣布上旨俄召爲泉府卿後遷刑部尙書有小吏誣告漕臣劉獻盜倉粟宰相桑哥方事聚斂衆阿其意鍛煉枉服立智理威曰刑部天下持平今輦轂之下漕臣以冤死何以正四方乎卽以實聞以是忤丞相出爲江東道

宣慰使在官務興學諸生有俊秀者拔而用之爲政嚴明豪民猾吏縮手不敢犯然亦無所刑戮而治元貞二年遷四川行省參知政事蜀有婦人殺夫者繫治數十年加以箠楚卒不得其實立智理威至盡按得之大德三年以參知政事爲湖南宣慰使繼改荆湖荆湖多弊政而公田爲甚部內實無田隨民所輸租取之戶無大小皆出公田租雖水旱不免立智理威問民所不便凡十數事上於朝而言公田尤切朝議遣使理之會有詔凡官無公田者始隨俸給之民力少蘇七年再遷四川行省參知政事八年進左丞雲南王入朝所在以驛騎

縱獵立智理威日驛騎所以傳命令事非有急且不得  
馳况獵乎王憚爲之止獵蜀人饑親勸分以賑之所活  
甚衆有死無葬者則以己錢買地使葬且修寬政以撫  
其民部內以治十年入朝帝以白金對衣賜之加資德  
大夫湖廣行省左丞湖廣歲織幣上供以省臣領工作  
遣使買絲他郡多爲奸利工官又爲剝剝故匠戶日貧  
造幣益惡立智理威不遣使令工視賈人有藏絲者擇  
買之工不告病歲省費數萬貫他郡推用之皆便至大  
三年以疾卒於官年五十七初贈資德大夫陝西行省  
右丞上護軍寧夏郡公諡忠惠再贈推誠亮節崇德贊

治功臣榮祿大夫中書平章政事柱國秦國公子二人  
長買訥翰林學士承旨次韓嘉訥御史大夫孫達理麻  
內府宰相

札八兒火者

札八兒火者賽夷人賽夷西域部之族長也因以爲氏  
火者其官稱也札八兒長身美髯方瞳廣額雄勇善騎  
射初謁太祖于軍中一見異之太祖與克烈汪罕有隙  
一夕汪罕潛兵來倉卒不爲備衆軍大潰太祖遽引去  
從行者僅十九人札八兒與焉至班朱尼河餼糧俱盡  
荒遠無所得食會一野馬北來諸王哈札兒射之殪遂

剗革爲釜出火于石汲河水煮而啖之太祖舉手仰天而誓曰使我克定大業當與諸人同甘苦苟渝此言有如河水將士莫不感泣汪罕旣滅西域諸部次第亦平乃遣札八兒使金人不爲禮而歸金人恃居庸之塞治鐵錮關門布鐵蒺藜百餘里守以精銳札八兒旣還報太祖遂進師距關百里不能前召札八兒問計對曰從此而北黑樹林中有間道騎行可一人臣向嘗過之若勒兵銜枚以出終夕可至太祖乃令札八兒輕騎前導日暮入谷黎明諸軍已在平地疾趨南口金鼓之聲若自天下金人猶睡未知也比驚起已莫能支吾鋒鏑所及流血被野關旣破中都大震已而金人遷汴太祖覽中都山川形勢顧謂左右近臣曰朕之所以至此者札八兒之功爲多又謂札八兒曰汝引弓射之隨箭所落悉畀汝爲己地乘輿北歸留札八兒與諸將守中都授黃河以北鐵門以南天下都達魯花赤賜養老一百戶并四王府爲居第札八兒每戰被重甲舞槊陷陣馳突如飛嘗乘橐駝以戰衆莫能當有丘真人者有道之士也隱居崑崙山中太祖聞其名命札八兒往聘之丘語札八兒曰我嘗識公札八兒曰我亦嘗見真人他日偶坐問札八兒曰公欲極一身貴顯乎欲子孫蕃衍乎札

八兒曰百歲之後富貴何在子孫無恙以承宗祀足矣  
丘曰聞命矣後果如所願云卒年一百一十八贈推忠  
佐命功臣太傅開府儀同三司上柱國追封涼國公諡  
武定二子阿里罕明里察阿里罕蚤從札八兒出入行  
陣勇而善謀憲宗伐蜀爲天下質子兵馬都元帥生哈  
只終湖南宣慰使贈推誠保德功臣金紫光祿大夫司  
徒追封涼國公諡安惠生陝西行省平章政事養安太  
府監丞阿思蘭太僕寺丞補字養安生阿葩實太僕寺  
卿明里察贈開府儀同三司上柱國追封涼國公諡康  
懿生戶部尚書亦不刺金陝西行省參知政事哈刺

### 朮赤台

朮赤台兀魯兀台氏其先刺真八都以材武雄諸部生  
子曰兀魯兀台曰忙兀與扎刺兒弘吉刺亦乞列思等  
五人當開創之先協贊大業厥後太祖卽位命其子孫  
各因其名爲氏號五投下朔方旣定舉六十五人爲千  
夫長兀魯兀台之孫曰朮赤台其一也朮赤台有膽略  
善騎射勇冠一時初怯列王可汗之子鮮昆有智勇諸  
部畏之怯列亦哈刺哈真沙陀等帥衆來侵兵戰不利  
近臣忽因荅兒等馳告太祖曰事急矣羣下忠勇無踰  
朮赤台者宜急遣之拒敵從之朮赤台承命單騎陷陣

射殺鮮昆降其大將失列門等遂併有怯列之地乃蠻滅兒乞台合兵來侵諸部有陰附之者不虞太祖領兵卒至諸部潰去乘勝敗之朮赤台俘其主扎哈堅普及二女以歸諸部悉平與扎哈堅普盟而歸之未幾乃蠻復叛朮赤台以計襲扎哈堅普殺之遂平其國朮赤台始從征怯列亦自罕哈啓行歷班真海子間關萬里每遇戰陣必爲先鋒帝嘗諭之曰朕之望汝如高山前日影也賜嬪御木八哈別吉引者思百俾統兀魯兀四千人世世無替子怯台材武過人自太宗及世祖歷事四朝以勞封德清郡王賜金印丙申賜德州戶二萬爲食

邑至元十八年增食邑二萬一千戶肇慶路連州德州洎屬邑俱隸焉怯台薨子端真拔都兒襲爵爲郡王太宗時與亦剌哈台戰勝帝卽以亦剌哈妻賜之世祖之征阿里不哥也怯台子哈荅與忽都忽跪而自獻于前曰臣父祖幸在先朝當軍旅征伐之寄屢立戰功今王師北征臣等幸少壯願如父祖以力戰自効旣得請於是戰于石木温都之地諸王哈丹駙馬臘真與兀魯忙兀居右諸王塔察兒及太丑台居左合必赤將中軍兵始交獲其將合丹斬之外刺之軍遂敗衄又戰于失烈延塔兀之地當帝前混戰至日晡勝之帝賜以黃金將

佐吏卒行賞各有差李瓊叛帝遣哈必赤及兀里半哈  
台闊闊出往討之哈荅與兀魯納兒台亦在行瓊平與  
有功焉哈荅子脫歡亦嘗從諸王徹徹都討只兒火台  
獲之又嘗破失烈吉要不忽兒于野孫漠連及征乃顏  
脫歡弟慶童亦在軍雖病猶力戰怯台二子曰端真曰  
哈荅哈荅三子曰脫歡曰亦隣只班曰慶童脫歡二子  
曰塔失帖木兒曰朶來塔失帖木兒一子曰匣刺不花  
自怯台而下凡九人皆封郡王云

### 鎮海

鎮海怯烈台氏初以軍伍長從太祖同飲班朱尼河水  
與諸王百官大會兀難河上太祖尊號曰成吉思皇帝  
歲庚午從太祖征乃蠻有功賜良馬一壬申從攻曲出  
諸國賜珍珠旗佩金虎符爲闐里必從攻塔塔兒欽察  
唐兀只温契丹女直河西諸國所俘生口萬計悉以上  
獻賜御用服器白金等物命屯田於阿魯歡立鎮海城  
戍守之壬申從太祖謀定漢地師次隆興與金將忽察  
虎戰矢中臆間裹瘡而出者復數四軍聲爲之大振旣  
破燕太祖命於城中環射四箭凡箭所至園池邸舍之  
處悉以賜之尋拜中書右丞相己丑太宗卽位扈從至  
西京攻河中河南均州癸巳攻蔡州以功賜恩州一千

戶先是收天下童男童女及工匠置局弘州旣而得西域織金綺紋工三百餘戶及汴京織毛褐工三百戶皆分隸弘州命鎮海世掌焉定宗卽位以鎮海爲先朝舊臣仍拜中書右丞相薨年八十四子十人勃古思繼食其封邑從世祖征花馬大理率兵千人結浮橋于金沙江以濟師中統初論功授益州等路宣撫使賜金虎符玉帶二年改東平路副達魯花赤討平叛寇尋遷濟南等路宣慰至元二年遷南京路達魯花赤四年討平蘄縣叛民以病乞謝事特授保定路達魯花赤賜錢一萬貫歸老于家卒年八十一

### 肖乃台

肖乃台秃伯怯烈氏以忠勇侍太祖時木華黎博兒木旣立爲左右萬戶帝從容謂肖乃台曰汝願屬誰麾下爲我宣力對曰願屬木華黎卽日命佩金符領蒙古軍從太師國王爲先鋒兵至河北史天澤之父率老幼數千詣軍門降國王承制授天澤兄天倪河北西路都元帥領真定乙酉天澤送母還白霄副帥武僊殺天倪以真定叛經歷王縉追天澤至燕請攝主帥遣監軍李伯祐詣國王軍前言狀且請援兵國王命肖乃台率精甲三千與天澤合兵進圍中山僊遣其將葛鐵槍來援肖

乃台撒圍迎之遇諸新樂奮擊敗之會日暮沮水爲營  
肖乃台料其氣索必肖遁乘勝復進擊大敗之擒鐵槍  
中山守將亦肖遁遂克中山取無極拔趙州僊棄真定  
奔西山抱犢寨肖乃台與天澤入城撫定其民未幾僊  
潛結水軍爲內應夜開南門納僊復據其城肖乃台倉  
卒以步兵七十踰城奔藁城遲明部曲稍來集兵威復  
振襲取真定僊棄城遁將士怒民之反覆驅萬人出將  
屠之肖乃台曰金氏慕國威信俟我來蘇此民爲賊所  
驅脇有何罪焉若不勝一朝之忿非惟自屈其力且堅  
他城不降之心乃皆釋之初僊之叛也其弟質國王軍

中聞之遁去肖乃台遣弟撒寒追及於紫荆關斬之俘  
其妻子而還乃整兵前進下太原略太行拔長勝寨斬  
僊守將盧治中圍僊於雙門寨僊遁去引兵出太行山  
東遇宋將彭義斌與戰敗之追至火炎山破其營擒義  
斌斬之至大明守將蘇元帥以城降遂引兵臨東平敗  
安撫王立剛于陽穀圍東平立剛走連水金守將棄城  
遁他將邀擊敗之遂定東平又與蒙古不花狗河北懷  
孟衛從國王定益都壬辰度河略汴京狗睢州遇金將  
完顏慶山奴與戰敗之追斬慶山奴金主入蔡諸軍圍  
之肖乃台史天澤攻城北面汝水阻其前結筏潛渡血

戰連日金亡朝廷以肖乃台功多命併將史氏三萬戶軍以圖南征賜東平戶三百俾食其賦命嚴實爲治第宅分撥牧馬草地日膳供二羊及衣糧等以老病卒于東平歸葬漠北子七人抹兀荅兒兀魯台知名抹兀荅兒歲戊戌從國王忽林赤行省于襄陽略地兩淮己未從渡江攻鄂州以功賞銀五十兩中統元年追阿蘭荅兒渾都海預有戰功二年從北征敗阿里不哥於失木禿之地三年又與李璫戰有功國王忽林赤上其功奉旨賞銀五十兩授提舉本投下諸色匠戶達魯花赤卒子四人火你赤江南行臺御史大夫

兀魯台中統三年從石高山奉旨拘集探馬赤軍授本軍千戶至元八年授武略將軍佩銀符十年攻樊城有功換金符武德將軍十一年渡江有功賞銀三百兩改武節將軍十二年四月軍至建安卒于軍子脫落合察兒襲職從參政阿剌罕攻獨松關有功陞宣武將軍尋命管領侍衛軍樞密院錄其渡江以來累次戰功十八年陞懷遠大將軍二十年江西行省命計武寧叛賊董琦平之改授虎符江州萬戶府達魯花赤二十四年移鎮潮州值賊張文惠羅半天等嘯聚江西行樞密院檄討之領兵破賊寨斬賊首羅大老李尊長等獲其僞銀

印三卒于軍

吾也而

吾也而珊竹氏狀貌甚偉腰大十圍父曰圖魯華察以武勇稱太祖五年吾也而與折不那濱克金東京有功九年從太師木華黎取北京領兵爲先驅下之捷聞授金紫光祿大夫北京總管都元帥留撫其人綏懷有方自京以南相繼來降時金將撻魯以惠州漁河口爲隘有衆數萬圖復北疆吾也而以銳兵千人擊摧其鋒殺數千人獲其旗鼓羊馬斬撻魯於軍中有趙守玉者據興州吾也而討平之十一年張致以錦州叛又攻破之

木華黎大喜以馬十匹甲五事賞其功十二年興州監軍重兒以兵叛吾也而往征之賊軍射殺所乘馬軍士憤怒奮戈衝擊大破賊軍十五年從征山東大戰東平馳赴陷陣生挾二將以還木華黎壯之以功上聞十六年從征延安矢中右股力戰破之俄又取葭鄜二州擒金梟將金鐵槍以獻十七年克鳳翔及所屬州郡十八年從帝親征河西明年下之詔賜吾也而馬五匹甲一事二十年從木華黎圍益都越二年下三十餘城太宗元年入覲命與撒里荅火兒赤征遼東下之三年又與撒里荅征高麗下受開龍宣泰葭等十餘城高麗懼請

和吾也而諭之曰若能以子爲質當休兵十三年遣其子縉從吾也而來朝帝大悅厚加賜予俾克北京東京廣寧蓋州平州秦州開元府七路征行兵馬都元師佩虎符憲宗元年召問東夷事對曰臣雖老倘籍威靈指麾三軍敵國猶可克况東夷小醜乎帝壯其言問飲酒幾何對曰唯所賜時有一駙馬都尉在側素以酒稱命與之角飲帝大咲賜錦衣名馬俄謝病歸七年復來朝帝憫其老謂曰自太祖時效勞至今者獨卿無愆賜賚甚厚以都元帥授其中子阿海八年秋九月辛亥夜中星隕帳前光數丈有聲吾也而曰吾死矣明日卒年九

十六子四人霄禮最有名太宗時授北京等路達魯花赤至元七年改授招勇大將軍河間總管

里曷思麥里

曷思麥里西域谷則斡兒朶人初爲西遼闊兒罕近侍後爲谷則斡兒朶所屬可散八思哈長官太祖西征曷思麥里率可散等城酋長迎降夫將哲伯以聞帝命曷思麥里從哲伯爲先鋒攻乃蠻克之斬其主曲出律哲伯令曷思麥里持曲出律首往徇其地若可失哈兒押兒牽斡端諸城皆望風降附又從征你沙不見城諭下之帝親征至薛迷思干與其主扎刺丁合戰于月亦心

揭赤之地敗之追襲扎刺丁等於阿刺黑城戰于禿馬  
温山又敗之追至慙顏城西寨又敗之扎刺丁逃入于  
海曷思麥里收其珍寶以還取玉兒谷德痕兩城繼而  
慙顏城亦下帝遣使趣哲伯疾馳以討欽察命曷思麥  
里招諭曲兒忒失兒灣沙等城悉降至谷兒只部及阿  
速部以兵拒敵皆戰敗而降又招降黑林城進擊幹羅  
思於鐵兒山克之獲其國主密只思臘哲伯命曷思麥  
里獻諸朮赤太子誅之尋征康里至孛子八里城與其  
主霍脫思罕戰又敗其軍進至欽察亦平之軍還哲伯  
卒會帝親征河西曷思麥里持所獲珍寶及七寶繖迎

見于阿刺思不刺思帝顧羣臣曰哲伯常稱曷思麥里  
之功其軀幹雖小而聲聞甚大就以所進金寶命隨其  
力所勝悉賜之仍命與薛徹兀兒爲必闇赤未幾曷思  
麥里奏向者嘗招安到士卒留亦八里城宜令扈從征  
河西許之命常居左右至也吉里海牙又討平失的兒  
威從太祖征汴至懷孟令領奧魯事帝由白坡渡黃河  
會睿宗兵攻金將合達敗之回駐金蓮川壬辰授懷孟  
州達魯花赤佩金符癸巳金將強元帥圍懷州曷思麥  
里率其衆及昔里吉思鎖刺海等力戰金兵退又遣蒲  
察寒奴乞失烈札魯招諭金總帥范真率其麾下軍民

萬餘人來降己亥六月帝以曷思麥里從軍西域宣力  
居多命其長子捏只必襲爲懷孟達魯花赤次子密里  
吉襲爲必闡赤令曷思麥里爲扎魯火赤歸西域大帥  
察罕行省帖木迭兒奏留之帝允其請庚子進懷孟河  
南二十八處都達魯花赤所隸州郡不從命者制令籍  
其家乙卯五月卒子密里吉復爲懷孟達魯花赤中統  
三年從攻淮西與宋戰死


元史卷一百二十

元史卷一百二十考證


肖乃台傳肖乃台○

臣祖庚

按一作笑乃解



元史卷一百二十考證



百代合聯肖代台。日麻東 封一於美代聯

元史卷一百二十考證

